

Yora Ishanincapeeni Lévi Yantaveeyetiniri Tasorentsi

LEVÍTICO

Oca sanquenarentsi irotaque mavatatsiri isanquenare Moiseshini. Ocamantacotiri Tasorentsi jaoca icanta icameetsatasanoti. Aisati ishanincapeeni Leví, iriotaque icoacaasantaqueriri irantaveeteneri, aisati incameetsashiretasanotanaque, irimatantearori irimoncaratero maaroni icoacaqueriri.

Intaasanoyeteneriri Tasorentsi.

1 ¹Ari iquemaqueri Moiseshi Tasorentsi anta Pancotsiqui yapatotimentanteetariri, icantiri:

²“Pincanteri pishanincapee: ‘Ariorica iramayetena virantsi, ocameetsati iramena ivacate, iriorica irovishate.’

³“Iriorica iramaque ivacate intayenari, ocameetsati iramaque shirampari caari amashiyetacha. Ontimatiye iramaqueri piqueapinitiroca Pancotsiqui yapatotimentantanari, iraantavaqueariri antaveetatsiri intaantenariri. ⁴Yora amaquerine ocameetsati iroanqueteneri iraco iitoqui, ontimanteari nompeacotajeneri caari cameetsatatsi yantayetiri. ⁵Irosati iroimotantaquenari. Impoiji itomipee Aarón iravaquero iriraja, intsiquirijantayetearo acaquerocapeequi aisati jenioquiji altar timatsiri piqueapinitiroca. ⁶Yora amaqueriri ocameetsati irisaraavaquero imeshina, irosati intotantayetaqueari maaroni, ⁷Irioquea yora antaveeyetatsiri oisherone paamari altariqui, irovetsicayetero tsitsi. ⁸iroanquetantayetariri itoyetaqueri, ivoripee, iito jero ireji iramporetsaquiniri. ⁹Yora amaqueriri inquivayetero iramporetsa aisati ivoripee. Irosati yora antaveeyetatsiri intaantaqueari maaroni. Irotaque noneacameetsajencatasanotiri intaapinitenari.

¹⁰“Aisati ariorica iramaque irovishate, iriorica ichiivote intayenari, ocameetsati iramaque shirampari caari amashitacha. ¹¹Ocameetsati

iroyenari araquerora altar. Irioquea itomipee Aarón, aavaquerone iriraja, intsiquirijantayetearo acaquerocapeequi altar. ¹²Irosati intotantayetaqueari maaroni, aisati irovanqueyeteri paamariqui itoyetaqueri, ivoripee, iito jero ireji iramporetsaquiniri. ¹³Yora amaqueriri inquivayetero iramporetsa aisati ivori, iriotaque intayenari antaveeyetsiri noneacameetsajencatasanotiri.

¹⁴“Iriorica iramaque vanquitachari intayenari impincatsatantenari, ocameetsati iramaque aparo tooquiti, teerica, aparo irijani paloma. ¹⁵Ariorica iravaqueri antaveetatsiri, ocameetsati iranaqueri araquerora altar, intsatijiteri iito, ontsaatantanaqueari iriraja intaanteariri. ¹⁶Irosati iraitantaqueari ishenomoti, irojoquero araquerora altar isotoapiniti catsirincateri, yoapinitironta samampo. ¹⁷Impoiji intotaqueri nianqui, irajiricaqueri ishivanquiqui, eiro icotaasanotirtsisi. Irosati intaantaqueari maaroni altariqui. Iriotaque intayenari noneacameetsajencatasanotiri.”

Impayeteriri ivanquirepee.

2 ¹“Ariorica iramayete pishaninca ipanquiyetiri impayetenari, ocameetsati iramaque tirico cameetsavanetasanotatsiri, irisaitaquero quejitsi aisati casancavaneri. ²Ari iramaqueneri itomipee Aarón. Impoiji aponi icaratiri iravaquero capichaji, irosati intaantaquearo altariqui. Irotaque inquenqueshiretantearori noneacameetsajencatasanotaquero oca itaaquenari. ³Ora timaarantaintsiri nonashitacaacaro, te onquempetearoji pashinipee itaayetanari, ocameetsatasanotaque. Irotaque irashiteari iriori Aarón aisati irishanincajeitajeari.

⁴“Ariorica iramayete ivanquire impapinitenari, ocameetsati iramaque tanta tashitachari, conoachari quejitsi aisati pochayetatsiri. Eiro yamirotsi conoachari tapiacaarori.

⁵“Aisati onquempetea iroorica iramaque cheerencachari, ocameetsati irovetsique cameetsavanetasanotatsiri tirico inconoaquero quejitsi. Eiro iconoirotsi tapiacaarori. ⁶Impoiji intsiquirijaquero quejitsi, irotaque iramenari.

⁷“Aisati iroorica iramena cheerencachari, ocameetsati irivetsiquero cameetsavanetasanotatsiri tirico conoachari quejitsi. ⁸Ariorica omposatanaque, ocameetsati iranaquenaro impapeeri antaveetanari. Impoiji iranaquero iriori anta altariqui. ⁹Aitaque iravaqueri antaveetanari capichaji, intayenari altariqui inquenqueshiretantearori, noneacameetsajencatasanotaquero oca itaaquenari. ¹⁰Ora timaarantaintsiri nonashitacaacaro, te onquempetearoji pashinipee itaayetanari; irointi ocameetsatasanotaque. Irotaque irayeri iriori Aarón aisati irishanincajeitajeari.

¹¹“Ariorica iramena tiricovane intaanteariri altariqui, eiro itsipatairotsi conoachari tapiacaarori aisati conoachari ija pitsi. ¹²Ariorica iramenaro

intarori oitsoquite ivanquire, ocameetsati intsipatayero tanta conoachari tapiacaarori aisati ija pitsi. Iro cantaincha eiroquea itairotsi irointi; tempa te onquempetearo noneacameetsajencatasantotiri.

¹³“Maaroni pamayetenari ocameetsati pintiviyetero, eiro pamashiyetarotsi; tempa nocarajeitaquempi.

¹⁴“Ariorica pamayetena pivanquire iroaquerari paviiti, ocameetsati pamaque sampatasantotaintsiri tashiiquitachari aisati eerequi tononcaitchari. ¹⁵Ocameetsati pisaitero quejitsi jero casancavaneri. Tempa irotaque oitsoqui pivanquire. ¹⁶Impoiji intayenaro antaveetatsiri capichaji ora tononcainchari aisati saitainchari quejitsi, intsipataquero casancavaneri. Irotaque inquenqueshiretantearori itaaquenaro ipincatsatantani.

Intayeteri virantsi iracameetsatantajariri Tasorentsi.

3 ¹“Intimerica amenarine ivira, iriorica ivacate shirampari, iroorica tsinane, intaimenterori naacameetsatantajariri, eiro yamashitaritsi amashitachari. ²Yora ashitariri ocameetsati iroanqueteneri iraco iitoqui, irosati iroantaqueari piqueapinitiroca Pancotsiqui papatotimentantani. Irioquea antaveetatsiri tsiquirijantayetearone iriraja altariqui acaquerocapeequi.

³⁻⁴“Yora amaqueriri ivira intaimenterori naacameetsatantajariri, ocameetsati iramaquenari, intaantearori ireji manacotirori iramporetsapee, aisati iranatarequiniri intsipataquero ishonquepeopee. ⁵Yora antaveeyetanari intayenaro maaroni ocapee altariqui, intsipataqueri ivatsapee, noneacameetsajencatasantotantearori.

⁶“Intimerica amenarine irovishate intaimenterori naacameetsatantajariri, ocameetsati iramena shirampari, iroorica tsinane, eiro yamashitaritsi amashitachari. ⁷⁻⁸Iriorica iramaquena ovishajaniqui, ocameetsati iroanqueteneri iraco iitoqui, irosati iroantaqueari piqueapinitiroca Pancotsi papatotimentantani. Irioquea antaveetatsiri tsiquirijantayetearone iriraja altariqui acaquerocapeequi.

⁹“Yora amaqueriri ivira intaimenterori naacameetsatantajariri, ocameetsati iramaquenari intaantenariri. Ora ireji maaroni ichomequi itotaqueri, jero ireji manacotirori, iramporetsapee, ¹⁰apiiteroqueti ishonquepeoqui, jero ireji manacotirori jero aisati itepoquiiniri intsipataquero ishonquepeopee. ¹¹Irosati intaantaquero antaveeyetanari maaroni ocapee altariqui, oquempeta oanarontsi pitaapinitanari pimpicatsatantani.

¹²⁻¹³“Iriorica iramena chiivo intayenari, ocameetsati iroanqueteneri iraco iitoqui, irosati iroantaqueari aca Novancoqui. Irioquea antaveeyetatsiri tsiquirijantayetearone iriraja altariqui acaquerocapeequi.

¹⁴“Yora amaqueriri ivira ocameetsati iramaqueri intaantenariri maaroni irejipee manacotirori iramporetsa, impincatsatantani,

¹⁵ apiiteroqueti ishonquepeoqui, jero ireji manacotirori, jero aisati itepoquiquiniri intsipataaquero ishonquepeopee iranatarequiniri.

¹⁶ Irosati intaantaquero antaveeyetanari maaroni ocapee altariqui, oquempeta oanaronsi pitaapinitanari pimpicatsatantanari.

¹⁷ “Irotaque oca nocantacantiri oncantaitatiyempani onttime.

Ocameetsati irimoncarajeitero pishanincajeitajeari aisati intomintajeitajeari iriori. Jaocarica pisavicajeiteri, eiro poarotsi ireji aisati iriraja.”

Intaimenterori caari cameetsatatsi.

4 ¹ Ari icantajiri Tasorensi Moisesi aisati.

² “Pincanteri pishanincapee: Itimirica omapocaqueri caari cameetsatatsi yantashitacaro, te irimoncarateroji nocantacantiri, jero oca iranteri:

³ “Iriorica anterone jivatacairiri antaveetatsiri caari cameetsatatsi; tempa icantacantajeitaqueri maaroni pishanincapee, ocameetsati intaajenari vacajaniqui caari amashitacha, intaimentajero yantaqueri.

⁴ Iramaqueri piqueapinitiroca Pancotsiqui papatotimentantanari, iroanqueteneri iraco iitoqui, irosati iroantaquenari. ⁵ Impoiji iraaajatavaque capichaji iriraja, inqueacaanaquero Pancotsiqui papatotimentantanari, ⁶ irosati iroviincantaquearo iracotsapaqui, intsiquirijimotenaro ishaaviji oticaashiroqui Nonantari; oncarate ⁷ irampiitapinitaquero. ⁷ Aisati impantayetero iroori oshevatapeequi orijaniqui altar nonashitacaari itaantarori casancavaneri timatsiri tsompoina. Iroquea timaarantaintsiri irisaitero ocatiantari antearo altar timatsiri piqueapinitiroca Pancotsi. ⁸ Irosati iraitantayetaqueri maaroni irejipee manacotirori iramporetsa iroimenterori caari cameetsatatsi, ⁹ aisati apiiteroqueti ishonquepeo, jero ireji itepoquiquiniri, aisati iranatarequiniri. ¹⁰ Inquempyeetiri vaca yaiteetiri maaroni, itaimenteetirori naacameetsajeitantajeariri. Irosati antaveetanari intaasanotantaqueari maaroni altariqui. ¹¹ Irointiquea imeshina, ivatsa, iito, ivoripee jero iramporetsapee, itia, ¹² ocameetsati iranaqueri otsapitapaaca pisavicajeitantari yojocapinitironta isamampovanere itaapinitiri altariqui. Irosati intaantaqueari.

¹³ “Omapocaqueririca maaroni pishanincapee caari cameetsatatsi, tecatsirica aparo iotacotachane yantashitacaro caari nocoacaavetari; tempa icantacantajeitaca maaroni. ¹⁴ Ariorica iriotacojeitajea te oncameetsate ora yantaqueri, ocameetsati iramajena Pancotsiqui yapatotimentantanari aparoni vacajaniqui iroimentajerori yantajeitaqueri. ¹⁵ Impoiji iroanquejeiteneri iraco iitoqui jivatacantajeitatsiri, irosati iroantaqueari. ¹⁶ Yora jivatacairiri antaveetatsiri iraaajatavaque capichaji iriraja, inqueacaanaquero

Nonantasanotariqui. ¹⁷Impoiji iroviincaatero iracotsapaqui intsiquirijimotero oticaashiro Pancotsi yayatotimentantanari; oncarate 7 irampiitapinitaqueru. ¹⁸Impoiji impantayetero capichaji iriraja oshevatapeequi orijaniqui altar. Ora timaarantaintsiri irisaitero ocatiantari antearo altar. ¹⁹Aisati iraaetavaquero maaroni ireji, intayero altariqui, ²⁰inquempetacantajeri itaimentiriri yantayetiri itsipapee, nopeacotantajanariri. ²¹Aisati inquempetaqueri iriori, iranaaqueri maaroni ivatsa otsapitapaaca pisavicajeitanti. Irosati intaantaqueari; tempa iriotaque intaimenterori yantajeitaqueri maaroni pishanincapee.

²²“Iriorica omapocaqueri jivatacantatsiri caari cameetsatatsi, yantashitacaro caari nocoacaavetari, timanaque irantane. ²³Ariorica iriotacotajea te oncameetsate yantaqueri, ocameetsati iramajena aparoni chiivo caari amashitacha. ²⁴Impoiji iroanqueteneri iraco iitoqui, irosati iroantaqueari anta yoapinitirinta itaimentirori caari cameetsatatsi. Iriotaque iroimentajerori yantaqueri. ²⁵Irosati iraaetavaquea antaveetatsiri capichaji iriraja, iroviincaatero iracotsapaqui impantayetero oshevatapeequi antearo altar. Ora timaarantaintsiri irisaitero ocatiantari. ²⁶Irosati intaantaquearo maaroni ireji, inquempetacantaquero itaimentirori naacameetsatantariri, aisati inquempetacantajero intaimentajeneriri yantaqueri jivatacantatsiri, irosati nompeacotantajejanari.

²⁷“Itimirica aparoni pishaninca omapocaqueri caari cameetsatatsi, terica iriotacoteaji yantashitacaro caari nocoacaavetari; tempa irisati cantacaaro. ²⁸Ariorica iriotacotajea te oncameetsate yantaqueri, ocameetsati iramaje aparoni chiivo caari amashitacha, iroimentajerori yantaqueri. ²⁹Impoiji iroanqueteneri iraco iitoqui, irosati iroantaqueari. ³⁰Yora antaveetatsiri iraaetavaquero capichaji iriraja, impoiji iroviinquero iracotsapaqui impantayetero oshevatapeequi antearo altar. Ora timaarantaintsiri irisaitero ocatiantari. ³¹Aisati iraaetavajero irejipee inquempetacantajeri yaitayetiri itaimentirori naacameetsatantariri, irosati intaantaqueari altariqui. Tempa iriotaque noneacameetsajencatanotiri. Irosati intaantaquenari, intaimentajero yantaqueri pishaninca, irosati nompeacotantajejanari.

³²“Yora pishaninca, iriorica iramaje ovisha iroimenterori caari cameetsatatsi, ocameetsati iramaje tsinane caari amashitacha. ³³Impoiji iroanquetenero iraco oitoqui, irosati iroantaquearo yoapinitirinta. ³⁴Yora antaveetatsiri iraaetavaquero capichaji iriraja, impoiji iroviinquero iracotsapaqui impantayetero oshevatapeequi itaantapinitariri. Iroquea timaarantaintsiri irisaitero ocatiantari. ³⁵Aisati iraaetavaquero maaroni orejipee, iquempetiri shirampari ovishajaniqui yoayetaqueri intaimentirori, naacameetsatantariri. Impoiji intayero maaroni altariqui, intaimentajero yantaqueri yora pishaninca, irosati nompeacotantajejanari.

Yora antaveetiniri Tasorensi intaimenterori yantayetiri ishanincapee.

5 ¹“Itimirica pishaninca incajemeeyeteri incamantacotantearori paitapeerica ineananotaqueri aisati iquemasanotaqueri, imanacotaquerorica, te incoyeji incamantacotero; timanaque irantane.”

²“Jaanicarica antayeretine camayetatsiri caariperoyetatsiri, iriorica camatsayetatsiri, coquiyetatsiri, ivirayeetari aisati mitajayetatsiri; terica iriotacoteaji, te incameetsatanajeji iriori.”

³“Itimirica antaquerori caariperotatsiri yashiyetari iriori atiri, te iriotacoveteaji, impoji iriotacovetanajea; timanaque irantane.”

⁴“Itimirica caari quenqueshireasanotachane cantashiyetachari: ‘Ioti Tasorensi ario nomataquero’, iro cantaincha te iriotacoteaji; impoji iriotacovetanajea, timanaque irantane.”

⁵“Jaanicarica cantashiyetacarori ocapee, ocameetsati incamantacotajero, ⁶aisati iramaje aparoni tsinane irovishate iroorica chiivo, intaimentajeneriri antaveetatsiri ora yantaqueri; irosati nompeacotantajejanari.

⁷“Teerica intimimotasanoteri iramanantanteari aparo ovishajaniqui, ocameetsati iramaje apite tooquiti, iriorica apite irijani paloma. Aparo iroimentajerori yantaqueri, irioquea itsipa intayenari. ⁸Irijivateri antaveetatsiri iroimenteneri aparoni yantaqueri, ocameetsati irimetojeri itsanoqui, eiroquea itsatijirotsi iito. ⁹Irosati intsiquirijantayetaquearo iriraja capichapeeji acaquerocapeequi altar. Iroquea timaarantaintsiri irisaitero ocatiantari; tempa irotaque iroimenteneriri yantaqueri. ¹⁰Impoji intayeri itsipa inquempetacantaqueri pashinipee itaayetiri. Aitaque oncanteari intaimentajeneri pishaninca yantaqueri, irosati nompeacotantajejanari.

¹¹“Tecatsirica timimotasanoterine iramanantanteari apite tooquiti, iriorica apite irijani paloma. Ocameetsati iramaje apimotiquite cameetsavanetasanotatsiri tirico, eiro isaitirotsi quejitsi aisati eiro iconoirotsi casancavaneri. Tempa irotaque yamimentirori caari cameetsatatsi. ¹²Ocameetsati iraanaueneri antaveetatsiri, irraavenetanteari capichaji, intayero altariqui nonquenqueshiretacotantearori impincatsatantenari. Irotaque intaimentajerori caari cameetsatatsi. ¹³Incantacoventanteariri antaveetanari yora antaquerori paitapeerica caari cameetsatatsi, nompeacotantajejanariri. Aisati oquempeta ipayetanari panquirensi, timaarantapaaintsiri irotaque irashi iriori antaveetanari.”

Iramimenterori yantayetiri.

¹⁴⁻¹⁵Ari icantajiri aisati Tasorensi Moisesi:

“Itimirica pishaninca peacotacarori iramayetena paitapeerica inashitacaanari, timanaque irantane. Ocameetsati iramajena aparoni

ovisha shirampari caari amashitacha, iroimenterori yantaqueri. Yora imentaqui quirequi ivinaro ovisha, ocameetsati irimoncarateri antaveetatsiri moncamentotsiqui timatsiri Nonantariqui. ¹⁶Ocameetsati impajeri antaveetatsiri impinatacoventajerori ipeacotacaró inashitacaanari aisati irovanaavajero capichaji. Impoiji intaimentajeneri yantaqueri, irosati nompeacotantajejanari.

¹⁷“Intimerica anteroneri caari cameetsatatsi, ora nocantaqueri: ‘Eiro pantirotsi’, eirorica iquenqueshireatsi, onttime irantane; irisati cantacantachane. ¹⁸Ontimatiye irijate yoapinitirinta ivira. Iraye aparo chiivo caari catsini amashitacha, pamenavaqueriyea pimoncarateri jaoca incarate impinatea, irosati iramantaqueari antaveetatsiriqui iroimentanteanari yantashitacari caari iquenqueshireveta irantero; nompeacotantajejanariri. ¹⁹Tempa yantimotasanotaquenaro caari cameetsatatsi, irisati cantacantajancha.”

Intaimenterori paitapeerica yamatavitavacayetari.

6 ¹Ari icantajiri Tasorensi Moisheshi:
²“Itimirica pishanincapee antimoyetenaroneri caari cameetsatatsi, amatavitiriri ishaninca, teerica incoyeji iroimpiajeneri iquempoyeacaavetariri, ariorica ipavaqueri, irompa ariorica icoshitashitacari, teerica, yaapitsatashitacari; ³aisati icantashitarica: ‘Te noneeroji pipeaqueri. Ioti Tasorensi queario nocantasanotaque’; jaanicarica antayeterone ocapee, timanaque irantane, ⁴iriotaque cantacayearone oca yantaqueri. Ocameetsati iroimpiajeneri maaroni icoshitaqueriri aisati yaapitsatashitariri, aisati irorica iquempoyeacaavetariri, ariorica inecojetajiri, ⁵aisati paitapeerica icantashitacari: ‘Te noneeroji’. Ocameetsati iroimpiajeneri ashitarori, aisati irovanaavajeneri impinatajeri, ariorica iraanaje virantsi iroyeri impinacoventajeari. ⁶⁻⁷Impoiji iramajeneri antaveetanari aparoni ovisha caari amashitacha, aisati irimoncarataqueri ivinaro. Irotaque intaimentajeneriri yantaqueri, irosati nompeacotantajejanari.”

Iquenquetsatacotiro intayeri.

⁸Ari icamantiri aisati Tasorensi Moisheshi, icantiri:

⁹“Pincanteri Aarón aisati itomipee oca noncamantayetempiri, jaoca incanterori ora intaasanotenari. Ocameetsati iroanqueteri altariqui, intaasanotantanaqueari tsiteniriqui irosati onquitaiteamanaque. ¹⁰Ari onquitaiteamanque inquitsaatearo antaveetatsiri iitsaare aisati intorosataquea jentamaotasantatsiri, irosati iraanataquearo isamampore itaqueri iroyero araquerora altar. ¹¹Impoiji inquitsaatajea pashini, irosati iraanataquearo samampo cameetsaiteriqui otsapitapaaca pisavicajeintari.

¹²“Ora paamari amorecatsine altariqui, eiro otsivacanetitsi. Yora antaveetatsiri iriotaque oisapiniterone capichaji quitaiteri, aisati iroameetsatashiyeteri virantsi intayeri, aisati intayero ireji intaimenterori naacameetsatantajeariri. ¹³Ora paamari timatsiri altariqui, oncanteani amoreque.”

Iquenquetsatacotiro iramayeteri ivanquirepee.

¹⁴“Jero pashini icantiriri jaoca incanterori ivanquirepee yamayetiri: Yora antaveeyetatsiri ocameetsati iramaquenaro altariqui. ¹⁵Aparoni icaratiri ocameetsati iraaeye capichaji tiricovane yamaquenari, aisati quejitsi. Impoiji intsipataaquero maaroni casancavaneri, irosati intaantaquearo altariqui, noneacameetsajencatasannotantea rori. Irotaque nonquenqueshiretantearori. ¹⁶Ora timaarantaintsiri irotaque iroyeari iriori Aarón aisati itomipee oyaraiteritequica Pancotsi papatotimentantanari; eiro oconoatsi tapiacaarori. ¹⁷Aisati ariorica intashitero, eiro itsipatairotsi tapiacaarori. Tempa irotaque nocashiacaqueriri iroyeari iriori. Noameetsatasanotaquero catsini oquempetacaro itaimentirori caari cameetsatatsi yantayetiri. ¹⁸Yora antaveeyetatsiri irishanincajeitajeari coajicani Aarón, incanteani iroapinitearo ora itaarantapinitanari; tempa noameetsatasanotaquero catsini. Jaanica oyearoneri oca, nonashitacaasanotacari.”

Iramayeteri antaveeyetatsiri.

¹⁹Icantajiri aisati Tasorentsi Moieshi:

²⁰“Jero iramayetenari Aarón aisati irishanincajeitajeari ariorica irisaiyeeteri iitoqui impeanteari antaveetatsiri: Oncarate 2 kilo tirico cameetsavanetatsiri, ocameetsati iraarante cashetani intayeri onquitaiteamane. Iro pashini intaajero ishaaviniji. Eiro yoavisairotsi aparo quitaiteri. ²¹Ocameetsati incheerenquero iramenari, inconoasanotaquero quejitsi, impoiji incotaaquero. Irotaque noneacameetsajencatasanotiri. ²²Aitaque incanterori irovetsiquero jivatatsiri yantaveetacanti yora irishanincajeitajeari Aarón nonashitacajari poyeetajearine irantaveetaje. ²³Maaroni iramayetenari antaveetanari, ocameetsati intaasanotero maaroni. Tecatsi catsini oyearone.”

Iquenquetsatacotiro intaimenterori caari cameetsatatsi.

²⁴Icantajiri Tasorentsi Moieshi:

²⁵“Poameteri Aarón aisati itomipee jaoca incanterori intaimenterori caari cameetsatatsi. Yora virantsi ocameetsati iroyenari yoapiniyeetirira. Tempa irotaque nonashitacaasanotari, ocameetsatasanotaque. ²⁶Yora antaveetatsiri taimenterone caari cameetsatatsi, ocameetsati iroaarantea

ivatsa oyaaraiteritequica Pancotsi papatotimentantanari ²⁷Paitapeerica anterine ivatsa, nonashitacaacari. Aisati intsiquirijacotaqueririca iriraja iitsaarequi, ocameetsati inquivajero oyaaraiteritequica. ²⁸Irorica coviti icotantariri ivatsa, ocameetsati improquero. Irompa irorica icotantacari ooya broncenaqui, ocameetsati iramecajero aisati inquivajero cameetsa.

²⁹“Yora intayeri nonashitacaasanotacari, apaniro iroyeari irinti antaveeyetatsiri. Tempa ocameetsatasanotaque. ³⁰Irintiquea itaimentirori caari cameetsatatsi yantayetiri, nopeacotantantariri, ora iqueacaanaqueri iriraja tsompoina Nonantariqui; eiro yoaritsi. Ocameetsati irointi intaasa noteri.

Intaimenterori icantacantayetari.

7 ¹“Jero pashini noncantempiri, jaoca incanterori intaimentero icantacantayetari irisati. Ora intaimentayereteri, nonashitacaasanotacaro ocameetsatasanotaque. ²Yora virantsi iroimenterori, ocameetsati iroyeri yoapinitantaririqui intaanteariri. Impoiji irisaitero iriraja jenioquiji altar aisati acaquerocapeequi. ³Ocameetsati irayero maaroni ireji, timayetatsiri irishichomequiqui, iramporetsaqui, ⁴ishonquepeoqui, itepoquiqui jero iranatarequiniri, aisati iraaquero apiiteroqueti ishonquepeo. ⁵Irosati intaantaquenaro antaveetatsiri altariqui. Irotaque intaimenterori yantayetiri. ⁶Aisati irishineteri iroajeiteari ivatsa maaroni antaveeyetatsiri. Iro cantaincha ocameetsati iroajeiteari oyaaraiteritequi Nonantari; tempa noameetsatasanotaqueri.

⁷“Yora intaimenterori icantacantayetari irisati, oquempetaro itaimentirori caari cameetsatatsi, aisati oquempetaro iroori oca noametaquempiri. ⁸Aisati inquempetaquea antaveetanari yora intaarantaqueri ivatsa, iriotaque irashi. Aisati ocameetsati iravaaquero imeshina. ⁹Aisati onquempetea iroorica iramayete ivanquirepee: iroorica tashitachari, cotachari, cheerencachari aisati vetsicachari tiricovane conoachari quejitsi jero orovaiquiyetachari, irotaque irashi antaveetimentaquerori. ¹⁰Iroquea otsipapee, irotaque irashiteari maaroni irishanincajeitajeari Aarón, impaarantavacaajeitearo iriori.

Intaimenterori iracameetsatantajeariri Tasorentsi.

¹¹“Jero pashini noncantempiri jaoca incantayereteri intaimentero naacameetsatantajariri. ¹²Irorica iroimenterori impasonquitantenari, ocameetsati aisati irame cameetsavanetatsiri tirico, vetsicachari quimomerontari tanta, jero cayeta conoachari quejitsi, caari conoacha tapiacaarori. ¹³Ora pitaimentirori pipasonquitantanari aisati naacameetsatantajimpiri, ocameetsati pintsipataquero tanta conoachari tapiacaarori. ¹⁴Maaroni iramayetenari, ocameetsati impaarantena,

irotaque irashi iriori antaveetatsiri; tempa iriotaque aajayetirori iriraja itaumentirori naacameetsatantariri.

¹⁵“Ora ivatsa intaumenterori impasonquitantenari aisati naacameetsatantariri, ocameetsati iroyeari quitaiteriqui itaantaquenariri. Eiro yoanontatsi capichaji iroantamanajeariri. ¹⁶Irointiquea iroorica imoncaratantarori icaashiacaanari aisati iroorica icoashitari iriori yamanari, ocameetsati iroyeari quitaiteriqui itaantaquenariri. Yora timaarantaintsiri ocameetsati iroanontajea iroantamanajeariri. ¹⁷Ariorica irimaacotaque mava quitaiteri, ocameetsati intaajeri maaroni. ¹⁸Jaanicarica oaquearine ivatsa mavatacotatsiri quitaiteri, timanaque irantane. Eiro noneacameetsatiritsi intaavetaquenari; tempa nopincaqueri.

¹⁹“Maaroni ivatsa pantayetaquearone paitapeerica caari noneacameetsati, eiro yoyeetarotsi. Ocameetsati intayeetero.

“Maaroni cameetsatatsiri ocameetsati iroyeari ivatsa.

²⁰“Yora pishaninca caari cameetsatatsi, iroaquearirica ivatsa itaumentirori naacameetsatantariri, eiro icarajetajiritsi pishaninca.

²¹“Yora pishaninca antayetaquerone caariperotatsiri, —iroorica irantaque yashiyetari atiri, virantsi aisati paitapeerica nopinquiri— iroaquearorica ivatsa itaumentirori naacameetsatantariri; eiro icarajetajiritsi pishaninca.”

Jaoca incanterori ireji jero iriraja.

²²Ari icantajiri Tasorentsi Moisesi:

²³“Pincanteri pishanincapee: Eiro catsini yoayetarotsi ireji vaca, ovisha jeri chiivo, ²⁴aisati irejipee camashiyetachari jeri yoaarantayetari covencayetatsiri, eiro yoarotsi. Ocameetsati irointi irantantayeteoro paitapeerica.

²⁵“Jaanicarica oaquearone irejipee virantsi itayeetanari; eiro icarajetajiritsi ishaninca.

²⁶“Jaocarica pisavicajeiteri, eiro catsini poayetarotsi iriraja vanquiyetachari aisati virantsipee. ²⁷Jaanicarica oyearone iriraja; eiro icarajetajiritsi pishaninca.”

Impeeyeteriri antaveeyetatsiri

²⁸Ari icantajiri Tasorentsi Moisesi:

²⁹“Pincanteri pishanincapee: Jaanicarica amenarine iroimenterori naacameetsatantajeariri, iriotaque amasanotendarine Nonantariqui. ³⁰Ocameetsati iramaquero ireji inejiquiniri jero inejisanori. Impoiji iroanquenaro aisati irishevashevataquero impashitantenaro. ³¹Irosati intaantaqueari antaveetatsiri ireji altariqui, iroquea ineji irotaque irashiteari Aarón aisati irishanincajeitajeari. ³²Ora ivori iracosanoriquiniri

yoimentirori naacameetsatantajeariri, irotaque irashi iriori antaveetatsiri. ³³Tempa iriotaque tairori ireji aisati saitirori iriraja. ³⁴Maaroni iramayetenari pishanincapee, nashitacaro ineji jero ivori. Irotaque nocashiacaqueriri Aarón irapiniteri aisati irishanincajeitajeari.”

³⁵Irotaque irapiniteri Aarón aisati irishanincajeitajeari ora intaarantapiniteneriri Tasorentsi; tempa irotaque icashiacaqueriri ariorica irintanaquearo irantaveejeitanaque. ³⁶Aisati icoacaasanotaqueri Tasorentsi ishanincapeeni Israel aisati irishanincajeitajeari incantaitatiyempani impapinijeiteri.

³⁷Irotaque oca yoamejeitaqueriri jaoca incantayeterori intayeteneriri: Iramayeteneriri ivanquirepee, intaimenterori caari cameetsatatsi yantayetiri, intaimenterori icantacantashiyetari irisati, iramayeteneri irinashitacayeariri jero intaimenterori iracameetsatantajeariri.

³⁸Irotaque icantasanotaqueriri Tasorentsi Moiseshi toncaariqui Sinaí, incamantanteariri ishanincapee, iriojeitanteari intayeteneri virantsipee isavicajeitapaquenta caaraiteriqui.

Yantaveetantacari Aarón aisati itomipee.

(Éxo. 29.1-37)

8 ¹Ari icantiri Tasorentsi Moiseshi:

²⁻³“Pamaqueri Aarón aisati itomipee, aisati inquitsaateari irantaveetanteari jeri quejitsi pisainatanteariri, jeri vaca intaimenterori caari cameetsatatsi, aisati apite chiivo jero cantirijaniquiqui tanta caari conoacha tapiacaarori. Impoiji pampatojeiteri pishanincapee piqueapinitiroca Pancotsi papatotimentantanari.”

⁴⁻⁵Ari imataquero Moiseshi icantaqueriri Tasorentsi. Yapatojeitaqueri ishanincapee anta iqueapinitantaroriqui Pancotsi, icantiri: “Jero oca icantaquenari Tasorentsi nanteri.”

⁶Irosati icajemantacari Aarón jeri itomipee. Ari yaaque nija iquivajeitaqueri. ⁷Impoiji yaaquero quitsaarentsi cameetsamaotatsiri, iquitsaataqueri Aarón aisati ishiticatsaquitakeri shiticacorontsi. Impoiji iquitsaataqueri pashini iroicoteari aisati iquitsaataqueri jenioquiji efod tontamaotatsiri vecaraachari itsaquiqui, irosati ishiticacotantacari.

⁸Impoiji yoaqueneri aisati pectoral irinejitacoteari, aitaque yoaquerori Urim jero Tumim. ⁹Irosati isavoinatantacari turbante aisati ipatacacotaqueneri oro ivancainaquí ipeantacari antaveetatsiri. Tempa irotaque icantaqueriri Tasorentsi.

¹⁰Impoiji yaaque quejitsi inashitacaari, irosati isaitantacaro Inantari Tasorentsi aisati maaroni timayetatsiri tsoompoina, yoameetsatantayetacarori. ¹¹Irosati itsiquirijantacaro iroori altar, ocarati 7 yapiitapinitaquero. Aisati isaitaquero maaroni timayetatsiri jero chomo aisati osavicantari, yoameetsatantacarori.

¹²Impoiji isaitaqueri iriori Aarón iitoqui, ipeantacari antaveetsasiri. ¹³Irosati iquitsaatantayetacari iriori itomipee aisati ishiticatsaquiyaqueri shintoropee, impoiji isavoinayetaqueri. Tempa irotaque icantaqueriri Tasorentsi.

¹⁴Irosati yamacantantacari Moiseshi vacajaniqui intaimenteneriri caari cameetsatatsi. Yora Aarón aisati itomipee yoanquetaqueneri iraco iitoqui. ¹⁵Irosati yoamantacari Moiseshi aisati yaavaquero iriraja yoviincaajataquero iracotsapaqui, irosati ipantantacaro oshevatapeequi altar aisati acaquerocapeequi. Ora timaarantaintsiri iriraja isaitantacaro ocatiantari altar. Aitaque ocantacari yoameetsantaquero, irotaque impeacotapinitanteanariri Tasorentsi caari cameetsatatsi yantajeitiri.

¹⁶Irosati yaantacaro maaroni ireji iramporetsaquiniri, iranatarequiniri aisati ishonquepeoquiniri aisati yaaquero apiiteroqueti ishonquepeo, irosati itaantacaro altariqui. ¹⁷Irointiquea imeshina, ivatsa jero ivojeayetaqueri, itaaquero otsapitapaaca isavicajeitantari. Tempa irotaque icantaqueriri Tasorentsi.

¹⁸Impoiji yamacantaqueri aisati Moiseshi ovisha. Yora Aarón jeri itomipee yoanquetaqueneri iraco iitoqui. ¹⁹Irosati yoamantacari, aisati isaitantacaro iriraja altar jenioquiji aisati acaquerocapee. ²⁰⁻²¹Ari itoyetaqueri maaroni. Yaaquero iito jero ireji, impoiji iquivaquero iramporetsa jero ivoripee, irosati itaantacaro maaroni altariqui. Ari ineacameetsajencatasanoquero Tasorentsi.

²²Irosati yamacantantacari Moiseshi pashini ovisha, intaimentantearori irinashitacaayeteanariri. Yora Aarón jeri itomipee yoanquejeitaqueneri iraco iitoqui. ²³Irosati yoamantacari. Ari yaavaque capichaji iriraja iracotsapaquiqui ipantantacari Aarón overaapaaca iyempita iracosanoriquiniri aisati iquempetaquero jivatatsiri iracotsapaqui jero jivatatsiri iititsapaqui. ²⁴Ari icajemaqueri itomipee Aarón, aisati iquempetaqueri iriori ipantayetaqueri. Ora timaarantaintsiri iriraja isaitantacaro altar jenioquiji aisati acaquerocapeequi.

²⁵Impoiji yaaquero irishichomequi aisati maaroni ireji iramporetsaquiniri, iranatarequiniri, ishonquepeoquiniri aisati apiiteroqueti ishonquepeo jero ivori iitisanoriquiniri. ²⁶Impoiji yaacotaquero cantirijaniquiqui tanta caari tapiacha iroapiniteneriri Tasorentsi. Aisati yaaquero aparato tanta quimomerontari caari tapiacha conoachari quejitsi aisati cayeta pochari, itsipataaquero maaroni ireji aisati ivori iitisanoriquiniri, ²⁷yoaqueneri iracoqui Aarón aisati itomipee; irosati yoancantacanari Tasorentsi. ²⁸Impoiji yaajiro Moiseshi yovancajeitaqueri, irosati itaantacaro altariqui. Itaimentaquero irinashitacaayeteanariri. Ari ineacameetsajencatasanoquero Tasorentsi.

²⁹Ari yaaquero aisati ineji, yovancaqueneri ishevashevataqueri. Iriotaque yaaqueri iriori; tempa irotaque icantaqueriri Tasorentsi.

³⁰Irosati yaantaca Moiseshi capichaji quejitsi inashitacaari jero iriraja itsiquirijaarantaquerori altar. Itsiquirijaqueri Aarón jeri itomipee aisati maaroni iitsaare yantaveetacari. Aitaque ocantacari ipeajeitantacari antaveetatsiri.

³¹Impoiji icantiri Aarón jeri itomipee: “Pintashiteri ivatsa aqueapinijeitiroca Pancotsi apatotimentantariri, poajeiteari, pisomatanteari tanta cantirijaniquiniri anashitacaacari. Tempa irotaque icantaquenari Tasorentsi: ‘Yora Aarón aisati itomipee, ocameetsati iroyeari ivatsa.’ ³²⁻³³Itimaarantapaaquerica ivatsa jero tanta, ocameetsati pintayeri. Aisati pintimajeitavaquetsita aqueapinijeitica oncarate 7 quitaiteri, irosati omoncaratantaqueari irinashicaasanotempi Tasorentsi. ³⁴Tempa irotaque icoacaquempiri, impeacojeitantempirori caari cameetsatatsi pantayetiri. ³⁵Irotaque ocameetsatantari pintimavaquetsita aqueapinijeitiroca Pancotsi apatotimentantariri, quitaiteriqui aisati tsiteniriqui, irosati omoncaratanteari 7 quitaiteri. Pimpincatsatero icantacantaqueri Tasorentsi, eiroquea picamajeitantatsi; tempa irotaque icantasanotaquenari.”

³⁶Ari imataquero Aarón aisati itomipee maaroni icantaqueriri Tasorentsi Moiseshi.

Intanacaro Aarón yantaveeti.

9 ¹Ari avisanque aparo dominco, irosati icajemantacari Moiseshi Aarón aisati itomipee jeri jivatacaajeitiriri ishanincapee. ²Icantiri Aarón: “Pamaque aparo vacajaniqui poimenterori caari cameetsatatsi, aisati aparo ovisha pintayeririri Tasorentsi, eiroyea yamashiyetatsi. ³Iriroquea ashanincapee, pincerori iramaque aparo chiivo iroimenterori caari cameetsatatsi aisati aparo vacajaniqui jeri ovisha moncarataquerori aparo irosarentsite, caari amashiyetacha. Iriotaque pintayeririri Tasorentsi. ⁴Aisati iramaque aparo anteari vaca jeri ovisha, iriotaque poimenterori iracameetsajeitantajeariri Tasorentsi. Iramayetaque aisati tiricovane camichoavatsatachari, conoachari quejitsi. Tempa meca inconijatimotempi Tasorentsi.”

⁵Ari yaajeitanaquero anta Pancotsiqui yapatotimentantariri Tasorentsi maaroni icantaqueriri Moiseshi. Iquempejijeitapaacaro maaroni ishanincapee, icatiimojeitapaacari Tasorentsi. ⁶Irosati iquenquetsatacantacari Moiseshi, icantajeitiri: “Irotaque oca icoacaajeitaquempiri Tasorentsi. Ocameetsati pimajeitero, impoiji ironijaajeitempiro itasorenca.”

⁷Impoiji icantiri Moiseshi Aarón: “Pinquempejitearo altar, poyeri vacajaniqui aisati ovisha jeri yamajeitaqueri iriori pishaninca. Pintaimenterori caari cameetsatatsi pantayetiri aisati yantajeitiri iriori, impeacojeitantempirori Tasorentsi.”

⁸Ari iquempejitacaró Aarón altar, irosati yoamaantacari vacajaniqui yoimentaqueró yantayetiri. ⁹Ari ipocapaaque iriori itomipee, yaacotanaqueneri iriraja. Irosati yoviincaajatantacaró Aarón iracotsapaqui, ipantayetaqueró oshevatapeequi altar. Ora timaarantaintsiri isaitantayetacaró ocatiantari. ¹⁰⁻¹¹Impoiji itaaquero altariqui irejipee, aisati iranatarequiniri jero ishonquepeo. Tempa irotaque icantaqueriri Tasorentsi Moiseshi. Irointiquea ivatsa jero imeshina itaaquero otsapitapaaca isavicajeitantari.

¹²Irosati yoamantacari aisati ovisha intayeneri iriori Tasorentsi. Yora itomipee yaacotanajiniri aisati iriraja, irosati isaitantayetacaró jenioquiji altar aisati acaquerocapeequi. ¹³⁻¹⁴Ari itotaqueri iito aisati ivatsapee. Impoiji iquivaquero iramporetsapee jero ivoripee. Irosati yantayetanacanari Aarón, itaantacariri maaroni altariqui.

¹⁵Ari yaaqueri chiivo yamaqueri iriori ishanincapee, yoaqueri, itaimentaqueró caari cameetsatatsi yantajeitiri. Iquempetaqueri itaimentaquerori iriori yantayetiri. ¹⁶Yamantacariri virantsi intayeneri Tasorentsi, imoncarataquero icantaqueri. ¹⁷Irosati yaacotantacaró iroori tononcavanetachari ivanquirepee. Yaavanetaque capichaji, irosati itaantacaró altariqui itsipataaqueri itaamaaqueri.

¹⁸Irosati yoamaantacari iriori anteari vaca aisati ovisha yamaqueri ishanincapee, intaimenterori iraacameetsatantajeariri. Yora itomipee yaanajiniri iriraja, irosati isaitantacaró jenioquiji altar aisati acaquerocapeequi. ¹⁹Aisati ipayetaqueri irejipee vaca, ovisha, ichomequi, ireji manacotirori iramporetsa, ishonquepeopee jero ireji aisati iranatarequiniri. ²⁰Ari yoaquero itsipataaqueró inejipeequi, irosati itaantacaró Aarón altariqui. ²¹Irointiquea inejipee aisati ivoripee iracosanoriquiniri yaaquero iracoqui yoancaqueneri Tasorentsi, ishevashevatacaacari. Aitaque ocantari yamejeitari iriori; tempa irotaque icantaqueriri Tasorentsi Moiseshi.

²²Ari yoancaquero Aarón iraco, icantacoventaqueri ishanincapee intasoncacoventanteariri Tasorentsi. Itsoncantanacarori itaimentiro caari cameetsatatsi aisati itaaqueneri icashiacaqueriri Tasorentsi jero itaimentaquerori iraacameetsatantajeariri; irosati injantareantanajaro altar. ²³Impoiji iqueanaque Moiseshi jeri Aarón Pancotsiqui yapatotimentantariri Tasorentsi. Isotoantanajari, icantacoventajiri aisati ishanincapee. ¡Irosati ineajeitantacaró ishiquaireane Tasorentsi! ²⁴Aisati oponeanaca paamari inaquentá Tasorentsi, otsoncapaaqueri virantsi altariquiniri, otaapaaqueri.

Ineajeitantarori, iquimoshiretasanojeitanaque catsini. Irosati itiyeroajeitantanaca quipatsiqui yoivotashijeitanacari.

Icamantacari Nadab aisati Abiú.

10 ¹Yora itomipee Aarón: Nadab jeri Abiú, yaayetaque aparopee itaantarori casancapatsari. Impoiji yoashitacaró omenqui paamari

caari poneacha altariqui. Ari yoaquero casancapatsari otaantariqui, irosati itaantavetacanari Tasorentsi. Iro cantaincha te irio coacayerine.

²Irosati oponeantanaca paamari Inantariqui Tasorentsi, otapaaqueri apiiteroqueti, icamajeitanaque. ³—Impoiji icantiri Moisesi Aarón:

Tempa icantitaca Tasorentsi:

“Jaanicarica quempejitaquenane,
nonijayeri jaoca nocanta nocameetsatasanoti.
Aisati nonijayeri maaroni pishanincapee
Notasorentsitanotaque catsini.”

Ari imajeretanaque Aarón.

⁴Irosati icajemantacari Moisesi Misael jeri Elsafán, itomi Uziel iriritsori Aarón, icantiri:

—Caate, paajanteri camaintsiri Inantariqui Tasorentsi, paanaqueri otsapitapaacanta asavicajeitantari.

⁵Irosati ijatashitantacari yaanajiniri iitsaasesanorini, yaanaqueri otsapiitapaacanta icantaqueriri Moisesi.

Irantayeteri antaveejitatsiri.

⁶Impoiji icantiri Moisesi Aarón aisati itomi Eleazar jeri Itamar:

—Eiroyea picantashinteinatirotsi piishi aisati eiro pitsereirotsi piitsaare poashiretacotanteariri, picamajeiticari avirori. Piquisacaaricari Tasorentsi, pitsoncancantiricari maaroni acarajeitiri. Irintiquea iracojeitearine ashanincapee aisati iroashiretacoteari; tempa iriotaque Tasorentsi tiancaquerori paamari yoasanquetantacariri. ⁷Aisati eiropa pisotoajeititsi aca piqueapinitantaroriqui Pancotsi papatotimentantanari, picamajeiticari avirori. Tempa aitaque nosainataquempi quejitsi, inashitacantaquempiri Tasorentsi.

Ari iquemisantaquero Aarón icantaqueriri Moisesi.

⁸Ari ineanataque iriori Tasorentsi, icantiri Aarón:

⁹“Ariorica pinqueapinite avirori jeri pitomipee Pancotsiqui papatotimentantanari, eiroyea piriotsi ovaja aisati cachojayetatsiri, picamajeiticari. ¹⁰Pimajeitantearori pinashitacayearo nonashitacaari aisati ora caari noshinetimpi pantero aisati cameetsatatsiri jero caariperoyetatsiri, ¹¹aisati pimatantearori poamejeiteri pishanincapee maaroni nocantacantiri, ora yovaanaquempiri Moisesi. Oca nocantacantiri, oncantaitatiyempani irotaque irimoncarajeiteri pishanincajeitajeari coajica.” ¹²⁻¹³Impoiji icantajiri Moisesi Aarón aisati apitetanajantsiri itomi, Eleazar jeri Itamar:

—Paayetajero pitaarantaqueneriri Tasorentsi, ocameetsati poajeitearo altariqui, eiro pitentairotsi tapiacaarori. Tempa irotaque pashiteari inashitacaasanotaquempiri, ocameetsatasanotaque. Irotaque poajeitantearori oyaaraiteritequi Inantari Tasorentsi. Tempa irotaque

icantaquenari. ¹⁴Irintiquea ineji inashitacaanariri Tasorentsi, aisati ivori inashitacaquempiri amaqueriri ivira, ocameetsati poacaajeiteari pitomipee aisati pishintopee jaocarica ocameetsaitetiri. Tempa irotaque pashijeji pitaimentiriri ashanincapee yaacameetsatantariri Tasorentsi. ¹⁵Ora ivori jero ineji aisati ireji, ocameetsati poanqueneri Tasorentsi. Impoiji pintayero ireji. Irotaque pashi paapiniteri aisati iriori pitomipee. Tempa irotaque icantaquenari Tasorentsi.

¹⁶Impoiji isampicoventiri chiivo yoimentaquerori caari cameetsatsi. Iro cantaincha aitaque imataqueri Eleazar jeri Itamar itaqueri. Irosati iquisatsatantacari. Icantiri:

¹⁷—¿Paitaquea caari poajeitanti poimentaquerori caari cameetsatsi ocameetsaitetira? Ocameetsasanaotaque; tempa iriotaque inashitacaquempiri Tasorentsi Poimentearome yantajeitiri ashaninca, impeacotanteanariri. ¹⁸Tempa ora iriraja, te pinqueacayeroji tsoinpoina Inantariqui Tasorentsi, ocameetsaveta poajeitearime ocameetsaitetira; tempa aitaque nocantavetaquempi.

¹⁹Ari icantanaqueri iriori Aarón:

—Pamene, imataquero notomi yoimentaquerori caari cameetsatsi aisati itaasanaotaqueneri iriori Tasorentsi, Iro cantaincha timatsi oca avishimotaquenari. Ariorica noajeitaquearime ¿ariompa irineacameetsaquaero Tasorentsi nantemeri?

²⁰Iquemantacariri Moiseshi, ari onimotanaqueri.

Poshiniripee yoyeetari aisati caari yoyeeta.

(Deut. 14.3-21)

11 ¹Icantajiri aisati Tasorentsi Moiseshi jeri Aarón: ²⁻³“Pincanteri pishanincapee ocameetsati poajeiteari poshiniripee timayetatsiri quipatsiqui, oipiyetarori iroanaro aisati apiteyetatsiri ishetaqui. ⁴⁻⁶Irintiquea pashinipee oipiayevetarori yoari, iriorica apiteyevetachari ishetaqui, eiro poaritsi: Yora cameyo, tejón jeri quiima, iriovetaca oipiarori yoari. Iro cantaincha te ampitete ishetaqui, te incameetsateji.

⁷⁻⁸“Yora chancho otimaveta apite ishetaqui, iro cantaincha te iroimpiyemparoji yoari; eiro poayetaritsi yocapee. Aisati eiro pantiritsi camayetatsiri, te incameetsayeteji.

⁹“Aisati iriori nijaasatipee, ocameetsati poayeteari timatsiri ishivanqui yamaatantari aisati iventaqui. ¹⁰⁻¹²Irintiquea caari timayetatsi ishivanqui, iventaqui: anteariyevetachari aisati irijaniquiyetatsiri; eiro poayetaritsi. Aisati eiro pantiritsi camayetatsiri, ocameetsati pimpinqueri.

¹³⁻¹⁹“Aisati iriori vanquiyetachari: anteari paquitsa, amempori, shimavaqui, milano jeri pashiniyetatsiri, coontiyetatsiri, avestruz, pompori, gaviota, jeri paquitsajaniquiyetatsiri, búho, cormorán, ibis,

cisne, pelícano, tisoni, cigueña, pashiniyetatsiri tsonpari, abubilla jeri pijiri; eiro poayetaritsi, ocameetsati pimpinqueri.

20-23 “Aisati iquempeta irijaniquiyetatsiri: aniiyetatsiri quipatsiqui aisati arajaniquiyetatsiri, eiro poayetaritsi; ocameetsati pimpinqueri. Iro cantaincha timatsi quempeyetariri yoca: tsipatorori iiti imitajantari quipatsiqui, shiveeriquiti, quentori, pitiro jeri tsinaro; iriotaque poayeteari. Irintiquea pashinipee ocameetsati pimpinqueri.

24 “Jero oca caariperotacayempineri:

“Jaanicarica antayeterine camayetatsiri, eiro icameetsatanajitsi irosati ontsitenijencaiteanaje.

25 “Jaanicarica aayeterine camatsiri, ocameetsati inquivajero iitsaare aisati eiro icameetsatanajitsi irosati ontsitenijencaiteanaje.

26 “Maaroni poshiniri timayevetachari ishetaqui, teerica ampiteteji aisati te iroimpiyemparoji yoari, te incameetsateji. Jaanicarica antayeterine, eiro icameetsatanajitsi iriori.

27-28 “Maaroni camatsayetatsiri timatsiri 4 iitipee, aniitantarori ivonquiti, te incameetsateji. Jaanicarica antaquerine camayetatsiri aisati aayeterine, ocameetsati inquivajero iitsaare aisati eiro icameetsatanajitsi irosati ontsitenijencaiteanaje.

29-30 “Jeri aniiyetatsiri quipatsiqui: tarato jeri onquiroyetatsiri, aisati noshicayetachari: macota, saniriyetatsiri, shancoropee jeri macotajaniquipee, te incameetsayeteji.

31 “Ainiro oshequi quempeyetariri yocapee, te incameetsateji. Jaanicarica antayeterine camatsiri, eiro icameetsatanajitsi irosati ontsitenijencaiteanaje.

32 “Aisati paitapeerica oantayetearine, iroorica yovetsiqueetiri inchatona, quitsaarentsi, meshinantsi, coshitaari, paitapeerica pantaveetantayetari; ocameetsati poviinqueri nijaqui. Eiro ocameetsatanajitsi irosati ontsitenijencaiteanaje, impojji oncameetsatanaje.

33 “Ariorica impiincajataque covitiqui, paitarica teyetachari, eiro ocameetsatanajitsi. Aisati iroori coviti ocameetsati irisherajero.

34 Ariorica pinquitaate nija covitiqui pincotantearori poayetari, eiro ocameetsatanajitsi. Aisati onquempetea pirayeveteari. 35 Maaroni camayetatsiri, ariorica impariaque iroanquetapaaquearo itashitanteetari, eiro ocameetsatanajitsi. Ocameetsati pimporoquero, aitaque pincanterori.

36 “Ariorica impiincajataquero camayetatsiri nija sotoaajatatsiri aisati quianarentsi, irosati oncanteani oncameetsajate. Irintiquea antaqueriri camatsiri, eiro icameetsatanajitsi.

37-38 “Aisati inquempetea intetaquearica yoantaroriqui panquirentsi impanquiteri, irosati oncanteani oncameetsaquite. Irompa ariorica oncajaiquiyetanaque, intetacotaquearorica, te oncameetsaquitanaje.

³⁹“Ariorica incamaarantayete poayetari, jaanicaica anterine, eiro icameetsatanajitsi irosati ontsitenijencaiteanaje. ⁴⁰Jaanicarica oaquearine camaintsiri aisati aanaquerine, ocameetsati inquivajero iitsaare, eiro icameetsatanajitsi irosati ontsitenijencaiteanaje.

⁴¹“Te oncameetsate iroyayetari noshicayetachari quipatsiqui; te incameetsateji.

⁴²“Maaroni noshicayetachari inejiqui jeri timayevetachari 4 itipee, eiro catsini poayetaritsi; te incameetsateji. ⁴³⁻⁴⁴Eiro picaariperotacantatsi avisati poaqueririca yocapee; tempa narotaque Pitasorentsiti. Ocameetsati poameetsajetempa aisati pincameetsashiretasanojeitanaque ; tempa nocameetsatasanotaque catsini narori. Irotaque nocantantimpiri: Eiro picaariperotacaaritsi noshicayetachari quipatsiqui. ⁴⁵Narotaque Tasorentisanori oimishitoajeitajimpiri Egiptoqui, Pintasorentsitantenari. Irotaque nocantasanotantimpiri: ocameetsati pincameetsashiretasanojeitanaque; tempa nocameetsatasanotaque catsini narori.”

⁴⁶⁻⁴⁷Irotaque oca icantacantiri jaoca incanteriri poshiniriyetatsiri, vanquiyetachari, nijaasatipee jeri maaroni noshicayetachari quipatsiqui; irinashinitacantayeteariri poshiniripee cameetsayetatsiri yoyetari aisati caari yoyeeta.

Oncameetsatantajeari tsinane ariorica ontimajanite.

12 ¹⁻²Ari icantajiri Tasorentsi Moisesi:
 “Jero pincamanteriri pishanincapee: Ariorica ontsomontete tsinane ontimaqueririca otomi, eiro ocameetsatanajitsi oncarate 7 quitaiteri, aisati onquempetea ariorica oneaventea. ³Yora jananequi ariorica oncaratapaaque 8 quitaiteri, ocameetsati intoyetiteeteri ishiramparitantari. ⁴Ora iriniro onquempoyeavaqueatsita oncarate 33 quitaiteri, eirotsita antitayetajarotsi paitapeerica nonashitacaari. Aisati eirotsita opoquitajatsi Nonantariqui, tequeratsitarica avisacotaje. ⁵Iroorica timaintsi ishinto, oncarate apite tominco eiro ocameetsatanajitsi, oquempeta ariorica oneaventa. Oncaratavajetsita 66 quitaiteri onquempoyempa.

⁶“Ariorica avisacotasananaje otimantacari otomi, iroorica ishinto, ocameetsati ompocaje piqueapinitiroca Pancotsi yapatotimentantanari. Amaje aparo ovishajaniqui moncarataquerori aparo irosarentsite, intaimentajenerori maaroni. Jeri aparo irijani paloma, iriorica aparo tooquiti, ompapaajeri antaveetatsiri. Iroyeri oquempeta yoimentirori caari cameetsatatsi. ⁷Irosati intaasanotantaquenari, incantacoventantajeorori; impoiji nompeacotajenero. Otimacotantacari tecatsitanaji oni.”

Irotaque oca icantacantiri ariorica ontimajaneyete tsinane. ⁸Tecatsirica timimotasanoterone amanantanteari aparo ovishajaniqui, ocameetsati

aye apite tooquiti, iriorica apite irijani paloma. Aparo intaasanotaque, irioquea itsipa iroimentajenero ocaariperotantacari. Irosati incantacoventantajearo antaveetatsiri, impoji tecatsitanaji.

Ocantacota patsaarontsi pajencantatsiri.

13 ¹Ari iquenquetsatacajiri Tasorentsi Moiseshi jero Aarón, icantiri: ²“Intimerica eereyetsine aisati sampoayetatsine, iroorica impiropiroitaque itsempequiqui, impatsayetaquerica quempetaca impiticayetaquea, ocameetsati irayeetanaqueri antaveetatsiriqui Aarón, iriorica pashini icaratiri irishanincatajeari. ³Ocameetsati iramenasanotiteri ipatsaayetaque ariorica oquitamarotaque ishiva ivatsaaroqui aisati oquiavintonataquerica, impoji iramaanaquea aaqueri patsaarontsi pajencantatsiri. Iriotaquerorica, irosati incantantaquea: ‘Te incameetsatanaje yoca.’

⁴“Irompa onquitamarotaquerica imeshina, teerica onqueavintonateri, aisati te onquitamarote ishiva; irosati irashitacotantaqueari oncarate 7 quitaiteri. ⁵Ariorica omoncaratapaajea 7 quitaiteri irosati iramenitantajeari. Irosatirica otimapaaque ivatsaaro, teerica ojayetanaqueri maaroni, irosati irashitacotantajeari aisati oncarate 7 quitaiteri. ⁶Omoncaratapaajearica 7 quitaiteri, irosati iramenitantajeari aisati. Irineaquerorica irotaji ompeajea, teerica ojayetanajeri, irosati incantantajea: ‘Tecatsitanaji ini, irointi ijareashivetaca imeshinaqui.’ Impoji inquivajero iitsaare, cameetsatanaji ini.

⁷“Iro cantaincha aiquerorica ojatanaitii ojareashaanaque; tempa aitaque yamenacantavetaca antaveetatsiriqui icantantacari: ‘Cameetsatanaji ini’, ocameetsati irijatashitajeri aisati, iramenantavajeariri. ⁸Irineitavajeririca ijareashei otsoncanaqueri maaroni, irosati incantantajea: ‘Te incameetsatanaje yoca, aaqueri patsaarontsi pajencantatsiri.’

⁹⁻¹¹“Ariorica aayeteri atiri patsaarontsi pajencantatsiri, ocameetsati irayeetanaqueri antaveetatsiriqui iramenasanotanteariri. Irineaquerorica oquitamarotanaque ishiva aisati ivatsa quitioncatanaque, iriotanaque oncanteani ivatsaaro ontime. Irosati incantantaquea: ‘Te incameetsataje yoca.’ Aisati eiro yashitacotiritsi; tempa iotanaque te incameetsatanaje.

¹²⁻¹³“Irompa ontsoncanaqueririca intsipaite iitiqui irosati iitoqui, intaquireanajea, irineavaqueririca antaveetatsiri tsoncanaja itaquireayetanaji, irointi iquitamarotanaque itsempequiqui; irosati incantantajea: ‘Cameetsatanaji ini.’ ¹⁴⁻¹⁵Irompa onconijatanaquerica ivatsa quitioncari, irineavaqueririca antaveetatsiri, irosati incantantaquea: ‘Te incameetsatanajeji.’

¹⁶⁻¹⁷“Irompa onquitamaroyetanaje ivatsa quitioncatatsiniri, ocameetsati irijatashiteri antaveetatsiri iramenitantavajeariri, irineavajerorica quitamaroyetanaji, irosati incantantajea: ‘Tecatsitanaji ini.’

18-19 “Intimerica patsaayetatsine ariorica intecatsitanaje, irosatirica oncantea onquitamarote aisati onquitioncate ivatsaaroqui; ocameetsati ironijayeri antaveetatsiri. 20 Irineaquerorica ivatsaaro onqueavintonataque aisati onquitamarotanaque ishiva, irosati incantantajea: ‘Te incameetsatanaje yoca, aaqueri patsaaronsi pajencantatsiri.’ 21 Irompa irineaquerorica jaocarica ipatsaavetacari, te onquitamarote ishiva aisati te onqueavintonatanaje, aiqhero ojatatii ompeajea; irosati irashitacotantaqueari oncarate 7 quitaiteri. 22 Irompa aiqherorica ojatatiye ontsoncanajeri, irosati incantantajea: ‘Te incameetsatanaje yoca, aaqueri patsaaronsi pajencantatsiri.’ 23 Irompa irosatirica ontimapaaque irointi amashitanaqueri, irosati incantantajea antaveetatsiri: ‘Tecatsitanaji ini.’

24-25 “Intimerica taachaneri, onquitioncatanaquerica ivatsa aisati onquitamarotanaque; ocameetsati irameniteri antaveetatsiri. Oquitamarotanaquerica ishiva itaaca aisati onqueavintonatanaqueririca, impojji iriotanaque opeanacari patsaaronsi pajencantatsiri; irosati incantantajea: ‘Te incameetsatanaje yoca, aaqueri patsaaronsi pajencantatsiri.’ 26 Irompa ariorica irineavajero te onquitamaroteji ishiva aisati te onqueavintonateji, aiqhero ojatajatii ompeajea; irosati irashitacotantaqueari oncarate 7 quitaiteri. 27 Ariorica omoncaratapaajea 7 quitaiteri, irosati iramenantajeari, aiqherorica ojatanaitii; irosati incantantajea antaveetatsiri: ‘Te incameetsatanaje yoca, aaqueri patsaaronsi pajencantatsiri.’ 28 Irompa irosatirica otimapaaque, aiqhero ojatajatii ompeajea, irosati iriotantanajea irointi eeretacaanaqueri itaaca. Irosati incantantajea: ‘Tecatsitanaji ini irointi amashitanaqueri.’

29-30 “Itimirica shirampari iroorica tsinane patsaayetatsine iitoqui, teerica inomaqui, ocameetsati irameneri antaveetatsiri. Irineaquerorica oqueavintonatanaqueri aisati quiteriyetanaque iishi, te aneaperoyetajero; irosati incantantajea: ‘Te incameetsatanaje yoca, aaqueri patsaaronsi aantatsiri aitoqui aisati anomaqui.’ 31 Irompa irineaquerorica te onqueavintonateri, irosati ocanta oquisaati iishi. Irosati irashitacotantaqueari oncarate 7 quitaiteri. 32-33 Omoncaratapaajea 7 quitaiteri, irosati iramenitantajeari. Irosatirica otimapaaque, te onqueavintonateri aisati te onquiterite iishi, irosati irameetacantantaqueari. Eiro yameetacotirotsi ivatsaaro. Impojji irashitacotajeri aisati oncarataje 7 quitaiteri. 34 Avisanajerica 7 quitaiteri, irosati iramenantajeari. Irosatirica otimapaaque aisati teerica onqueavintonatajери; irosati incantantajea: ‘Tecatsitanaji ini.’ Ocameetsati inquivajero iitsaare. 35-36 Irompa aiqherorica ojayetanajatiiri, aitaque icantavetajeri antaveetatsiri: ‘Tecatsitanajimpi’; ocameetsati iramenajeri aisati. Eiroquea yamenitajiritsi iishi quiteriri; tempa te incameetsatanaje. 37 Irompa irineaquerorica, irosati otimapaaque aisati soquijanaji quisaari

iishi, iriotanaque tecatsitanaji ini. Irosati incantantajea: ‘Cameetsatanaji yoca.’

38-39 “Iriorica shirampari, iroorica tsinane piropiroitatsine imeshinaqui, ocameetsati irameniteri antaveetatsiri. Irineitaqueririca ipiropiroitaque aisati iquisaaporoquiyetaque, iriotanaque irointi isaampoatashiyetaca; irosati incantea incameetsate.

40 “Ariorica omaraanaca iishi atiri, incaarapancainavetanaquearica, irosati incantea incameetsate. 41 Aisati omaraanaquearica ivancainaquiniri, irosati incantea incameetsate. 42 Irointiquea onconijatanaquerica ivatsaaro quiteshimaatatsiri aisati quitioncatatsiri ivancainaquí, iriotanaque irotaque aaqueriri pajencantatsiri. 43-44 Irosati iramenitantajeari antaveetatsiri ivatsaaro ivancainaquiniri. Ariorica oquiteshimaataque aisati oquitioncataque, irosati incantantaquea: ‘Te incameetsatanaje.’

45 “Jaanicarica aayete patsaaronsi pajencantatsiri, ocameetsati inquitsaatearo tsereayetatsiri iitsaare. Eiro ipashicainatatsi, irointiquea impashicavantetaquea. Irosati incajemantayetea: ‘¡Te noncameetsate! ¡Te noncameetsate!’ 46 Irosatirica oncantea ivatsaaro, irosati incanteetantaqueari te incameetsate. Ocameetsati irisavique apaniro anta otsapitapaaca nampitsi.

Ompoaquerica iroori paitapeerica.

47-48 “Ariorica pineero ompoaque quitsaarentsi cameetsamaotatsiri, iroorica itijetiri iviti, iriorica meshinantsi aisati paitapeerica yovetsiqueeyetiri, 49 iroorica conijatanaintsine quenashitatsiri aisati iroorica quitioncatatsiri; irointi pajencantatsiri. Ocameetsati ironijayeeteri antaveetatsiri. 50 Iramenavaquerorica iriori, irosati irashitacotantaquearo oncarate 7 quitaiteri. 51 Omoncaratapaaquearica 7 quitaiteri, irosati iramenantajeero. Otsoncayetanaquerorica poayetanaque, irotaque opajencantatsiri oamantatsiri, aisati te oncameetsayetanaajeji ocapee. 52 Paitapeerica poayetatsine ocameetsati intaasanoyeetero; tempa irotaque pajencantatsiri. 53-54 Irompa iramenavetavaquearorica antaveetatsiri, eirorica otsoncanacarotsi ompoayetanaque; irosati inquivacantantajeero. Impoiji irashitacotajero oncarate 7 quitaiteri.

55 “Ariorica iramenajero, irineaajerorica te ompempaji opoaque; te oncameetsataje oca. Ocameetsati intayeetero, omavetaquea teerica ontsoncavetea ompoayete tsompoina aisati acaqueroca. 56 Irompa irineaquerorica peavetaja capichaji opoaque, iquivantavetajarori; ocameetsati irintsereacotero. 57-58 Iro cantaincha ampiitajarica ompoayetaje aisati, ocameetsati intaacoyeetero. Irompa ompeanajarica iquivantajarori, ocameetsati irampiitajero inquivasanoyetajero. Irosati oncameetsayetantanajea.”

⁵⁹Irotaque oca icantacantiri jaoca incanterori patsaarontsi pajencantatsiri aayeririca atiri, aisati ompoayerica quitsaarentsi cameetsamaotatsiri, vetsicachari vititsi jeri meshinantsi. Irotaque incantanteeteari: “cameetsatanaji,” aisati “te incameetsateji.”

Incameetsatantajeari patsaayetatsiri.

14 ¹Ari iquenquetsatacaajiri Tasorentsi Moiseshi, icantiri: ²⁻³“Jero oca incanteari incameetsatantajeari aayetiri patsaarontsi pajencantatsiri: Ocameetsati irayeetanaqueri otsapitapaaca isavicajeitantari. Irosati irijatashitantaqueari antaveetatsiri iramenanteariri. ⁴Irineaqueririca caratanaji, irosati intiancantaquea ayenerine apite aneatsiri tsimeeri cameetsari, aisati santari, tijachari quitioncamaori jero inchashijaniqui icanteetiri hisopo. ⁵⁻⁶Impoiji iroacanteri aparo tsimeeri chomoqui, ojaajatantari nija saancajari. Irosati iraantaqueari itsipa aneatsiri, iroajantaqueri irirajaqui yoaqueri conoajatainchari saancajariqui, aisati iroori santari, tijachari quitioncamaori jero inchashijaniqui hisopo. ⁷Impoiji intsiquirijanteari iriori patsaaveitachaniri oncarate 7 irampiipinitaqueri incameetsatantajeari. Ari incante: ‘Cameetsatanaji yoca.’ Irosati iroaraantajeari iriori tsimeeri.

⁸“Yora tecatsitacotanajantsiri, ocameetsati inquivajero iitsaare, inquivajea iriori, aisati irameetajea maaroni incameetsatantanajeari. Impoijiquea irijataje isavicajeitinta ishaninca, iro cantaincha oncarate 7 quitaiteri irisavichiveetavaqueatsita ivancoqui saiteriqui.

⁹Omoncaratapaajearica 7 quitaiteri, irosati irameetasanotantajea aisati, maaroni ishishopanaqui, itamacoqui jero ishivapee. Aisati inquivayetajero iitsaarepee aisati incaate, irosati incameetsatantanajea. ¹⁰Ariorica oncaratapaaje 8 quitaiteri, irosati irantajea apite ovisha aisati aparo tsinane caari amashiyetacha, moncarataquerori aparo osarentsite. Aisati iramaque 6 kilo cameetsavaneri tirico ari nianqui, conoavatsatachari quejitsi. Iramacotaque aisati aparo voteyajaniquiqui quejitsi. ¹¹Yora antaveetatsiri antacanterone incameetsatantajeari, iroatiaqueri patsaaveitachaniri aisati iroyetaquero yamayetiri piqueapinitiroca Pancotsi papatotimentantanari. ¹²Irosati irantaqueari aparo ovishajaniqui, intsipataaqueri quejitsi boteyajaniquiniri iroanquenari altariqui. Iriotaque iroimentajeneriri yantayetiri. ¹³Irosati iroantaqueari yoapiniyeetiri virantsi yoimenteetirori caari cameetsatsi, aisati itaasanoyeetiri. Yora yoimenteetirori yantashiyetari aisati yoimenteetirori caari cameetsatsi, iriotaque irashiteari antaveetatsiri. Irotaque cameetsasananotatsiri; tempa iriotaque nonashitacaasanotacari.

¹⁴“Impoiji iraye antaveetatsiri capichaji iriraja yoimentaquerori irantane, impantantayeteari overaapaaca iyempita iracosanoriquiniri,

aisati jivatatsiri iracotsapaqui jero jivatatsiri iititsapaqui. ¹⁵⁻¹⁶ Impoiiji iraacotaquero quejitsi, irisaque capichaji iracoqui irampatequiniri; irosati iriviincantaquearo iracotsapaqui iracosanoriquiniri. Oncarate 7 irampiipinitero intsiquirijimotenaro. ¹⁷⁻¹⁸ Yora timaarantapaatsiri iracoquiniri, impoiiji impantantayetajeari aisati, iquempetaqueri ipantantayetacariri iriraja ovisha. Irosati impantantaqueari aisati iitoqui. Aitaque incantaqueriri antaveetatsiri, irosati nompeacotantajejanari yantayetiri. ¹⁹⁻²⁰ Irosati iramantaqueari iroimenterori caari cameetsatsi patsaaveitachaniri, iroameetsatantajeari. Impoiiji iroyeri iriori pashini, intaasanotaqueri altariqui, intsipataaqueri vetsicachari cameetsavanetatsiri ivanquire. Intayeri maaroni. Aitaque incanterori antaveetatsiri, nompeacotantajejanariri yantayetiri. Impoiiji cameetsatanaji ini.

²¹⁻²² “Iriorica mantsiataintsine caari otimimotasanoti paitapeerica, tecatsi irayeri apitetatsine ovisha. Ocameetsati iraye aaroni iroimentajerori irantane nompeacotantajejanariri. Aisati iraye 2 kilo vetsicachari cameetsavanetasanotatsiri ivanquire conoachari quejitsi, aisati aparo voteyajaniquiqui quejitsi, jeri apite tooquiti, iriorica apite irijani paloma. Irotaque iramayeteri iriori ocarati timimotiriri. Aparo iroimenterori yantayetiri, irioquea itsipa intaasanoteri. ²³⁻²⁴ Oncaratapaaquerica 8 quitaiteri, irosati iramantaqueanari antaveetatsiri piqueapinitiroca Pancotsi yapatotimentantanari. Irosati irantavaquero maaroni oca icashiacaanari, iroanquenaro. ²⁵ Impoiiji iroyeri ovisha aisati iravaaque capichaji iriraja impantanteari patsaaveitachaniri, overaapaaca iyempita iracosanoriquiniri, aisati jivatatsiri iracotsapaqui jero jivatatsiri iititsapaqui. ²⁶⁻²⁸ Aisati iraaque quejitsi, irisaque capichaji iracoqui irampatequiniri, irosati iroviincantaquearo iracotsapaqui iracosanoriquiniri. Oncarate 7 irampiipinitero irintsiquirijimotantenaro. Impoiiji impantantayeteari aisati, inquempetaqueri ipantantayetacariri iriraja ovisha. ²⁹ Yora timaarantatsine impantantayeteari iitoqui patsaaveitachaniri, nompeacotantajejanariri yantayetiri caari cameetsatsi. ³⁰⁻³¹ Irosati iroantaqueari iriori aparo tooquiti, iriorica irijani paloma icarati yamaqueri. Aparo iroimentero caari cameetsatsi, irioquea itsipa intaasanoteri aisati iroori ivanquire. Aitaque incanterori antaveetatsiri nompeacotantajejanariri patsaaveitachaniri, irosati incameetsatantajejanari.”

³² Irotaque oca icantacantiri, jaoca incanteari aayetiri patsaarontsi pajencantatsiri caari otimimotasanoyeti irameri, incameetsatantajeari.

Ompoyeterica pancotsi.

³³ Ari iquenquetsatacaajiri Tasorentsi Moisesi jeri Aarón. Icantiri:

³⁴⁻³⁵ “Ariorica parejeitapaaquearo quipatsiqui Canaán nopaquempiri pisavicajeitanteari, nontianquerorica ompoyete pancotsipee

pinampiyetapemparonta, yora ashitarori ivanco ocameetsati irijatashiteri antaveetatsiri, incantapeeri: ‘Quempetaca iro patsaarontsijenca timaintsiri novancoqui.’

³⁶“Irijataquerica antaveetatsiri, eirotsita iqueitapaatsi. Iroimisoquijacantavaquerotsita maaroni timayetatsiri tsompoina, tecatsiquea oncantea oncaariperoyetanaque. Impoijiquea inqueanaque iramenantearori irotaquerica.

³⁷⁻³⁸“Irineaquerorica otantopeequi opantayetacaro quenashipatancari, iroorica quitioncapatancari, oqueantanacaro tsompoina; irosati irisoquijantanajea. Impoiji irashitacantero oncarataque 7 quitaiteri. ³⁹⁻⁴⁰Omoncaratapaaquearica 7 quitaiteri, irosati iramenantajeoro. Otsoncayetanaquerorica otantopeequi, irosati irojocacaantayetaquearo mapipee opantayetacari. Irojocacantero otsapitapaaca isavicajeitanti, teenta oncameetsaitete. ⁴¹Impoiji inquimetacantayetero aisati tsompoinaqui pancotsi, irojocacantero ovanequi otsapitapaaca nampitsi teenta oncameetsaitete. ⁴²Irosati iraacantantajea pashini mapi impinaajero, yojocantayetaqueri aisati impachacacantajero quipatsi.

⁴³“Irompa ampiitajearica aisati, aitaque yojocantayevetacaro mapipee, iquimetacantayevetacaro quipatsi aisati ipachacacantajiro otantoqui. ⁴⁴Yora antaveetatsiri ocameetsati inqueanaje aisati, iramenantajearori. Otsoncayetanajirorica, iriotanaque irotaque patsaarontsijenca pajencantatsiri. Ora pancotsi te oncameetsatanaje. ⁴⁵Ocameetsati intireacantajero maaroni otantorepeeni, aisati irojocacantero otsapitapaaca nampitsi teenta oncameetsaitete. ⁴⁶Jaanicarica queaquerone pancotsi ainiroquera yashitacantiro antaveetatsiri, eiro icameetsatanajitsi irosati ontsitenijencaiteanaje. ⁴⁷Aisati oainchaneri pancotsiqui, iroorica irimantaquearo, ocameetsati inquivajero iitsaare oncameetsamaotantanajeari.

⁴⁸“Irompa iramenavetajearorica, teerica anejeroji, irosati ipachacacantantajarori, irosati incantantajea: ‘Cameetsatanaji pancotsi;’ peanaja oni patsaarontsijenca. ⁴⁹Iroameetsatantajearori, ocameetsati iraye apite tsimeri, santari, quitsaarentsi tijachari quitioncamaori jero inchashi hisopo. ⁵⁰Impoiji iroamayeri aparato tsimeri chomoqui otimantari nija saancajari. ⁵¹Irosati irantayetaquearo santari, quitsaarentsi quitioncamaori, hisopo aisati iriori tsimeri caari yoi, irojantayetaquero irirajaqui tsimeri yoaqueri, conoaajatainchari nijaqui saancajari. Aisati irintsiquirijayetaquero pancotsi oncarate 7 irampiipinitero. ⁵²⁻⁵³Aitaque incanterori iroameetsatantajeoro pancotsi: irirajaqui tsimeri, nija saancajari, aneatsiri tsimeri, santari, hisopo jero tijachari quitioncamaori. Impoiji iraanajeri tsimeri otsapiitapaaca nampitsi, iroimpacaajeri. Aitaque oncanteari oncameetsatantajeari pancotsi.”

⁵⁴⁻⁵⁶Irotaque oca icamantiriri iriotantearori oashinoncantsi patsaarontsijenca, quitsaarentsiqui, pancotsipeequi, jero avatsaaropeequi,

asaampoayetaquerica aisati ampiroyetaquerica. ⁵⁷Irotaque iriotantayeteorori irotaquerica patsaarontsi pajencantatsiri, irompa caaririca oni. Aitaque ovecaratapaacari cantacotirori patsaarontsijenca.

Iquenquetsatacotiro imantsiare shirampari.

15 ¹Iquenquetsatacaajiri Tasorentsi Moiseshi jeri Aarón, icantiri: ²⁻³“Pincanteri pishanincapee: Ariorica irimantsiate ishampirantariqui, yaparajatirorica yashitari; eiro icameetsatanajitsi. Aisati eirorica yaparajavetajarotsi, irosati incantea eiro icameetsatajitsi.

⁴“Jaocarica imairi aisati jaocarica isavicayetiri ivitejayetaquero, eiro ocameetsayetanjitsi iroori.

⁵“Jaanicarica antiterine imaantari, ocameetsati inquivajero iitsaare aisati incaataje iriori. Eiro icameetsatanajitsi irosati ontsitenijencaiteanaje.

⁶“Jaanicarica savicantaquearone isavicantayetari, ocameetsati inquivajero iitsaare aisati incaataje iriori. Eiro icameetsatanajitsi irosati ontsitenijencaiteanaje.

⁷“Jaanicarica pamitaquerine, ocameetsati inquivajero iitsaare aisati incaataje iriori. Eiro icameetsatanajitsi irosati ontsitenijencaiteanaje.

⁸“Ariorica inquitiojaqueri tecatsitatsiri, ocameetsati inquivajero iitsaare aisati incaataje iriori. Eiro icameetsatanajitsi irosati ontsitenijencaiteanaje.

⁹“Otimirica savicamentotsi isavicantayetari, te oncameetsatanaje.

¹⁰“Jaanicarica pamititaquerine isavicantari, eiro icameetsatanajitsi irosati ontsitenijencaiteanaje.

“Jaanicarica aanaquerone ocapee, ocameetsati inquivajero iitsaare aisati incaataje iriori. Eiro icameetsatajitsi irosati ontsitenijencaiteanaje.

¹¹“Jaanicarica pamitaquerine, teerica inquivacotajea, ocameetsati inquivajero iitsaare aisati incaataje iriori. Eiro icameetsatanajitsi irosati ontsitenijencaiteanaje.

¹²“Ariorica irajiricaquero coviti, ocameetsati improqueetero. Iroorica inchatona yovetsiqueetiri, ocameetsati inquivetajero.

¹³“Ariorica iravisacotaje, ocameetsati irimoncaratero 7 quitaiteri iroameetsatantajeari. Aisati inquivajero iitsaare aisati incaataje iriori saancajariqui nija. Irosati incameetsatantanajea. ¹⁴Ariorica omoncaratapaaquea 8 quitaiteri, irosati irantaquea apite tooquiti, iriorica apite irijani paloma; irosati iramantaqueari piqueapinitiroca Pancotsi yapatotimentantanari, impapeeri antaveetatsiri. ¹⁵Irosati irantavaqueari, aparoni iroimenteneri caari cameetsatatsi irioquea itsipa intaasanotenari. Aitaque incanteriri noameetsatantajeariri mantsiatatsiri ishampirantariqui.

¹⁶“Ariorica yaparajatiro ishampirantari, ocameetsati incaataje. Eiro icameetsatanajitsi irosati ontsitenijencaiteanaje.

¹⁷“Ariorica ivitejaquero quitsaarentsiqui, iroorica meshinantsi, ocameetsati inquiveetajero. Eiro ocameetsayetanaajitsi irosati ontsitenijencaiteanaje.

¹⁸“Ariorica irantero shirampari tsinane, ocameetsati incaajeitaje. Eiro icameetsatanajitsi irosati ontsitenijencaiteanaje.

Iquenquetsatacotiro omantsiare iroori tsinane.

¹⁹“Ariorica oneaventea tsinane, eiro ocameetsatanajitsi oncarate 7 quitaiteri. “Jaanicarica pamitaquerone, eiro icameetsatanajitsi irosati ontsitenijencaiteanaje.

²⁰“Jaocarica omairi ariorica oneaventa, eiro ocameetsatanajitsi. Aisati oquempeta paitapeerica osavicanatayetari, eiro ocameetsatanajitsi.

²¹⁻²³“Jaanicarica pamititaquerone omaantari aisati osavicanatayetari, ocameetsati inquivajero iitsaare aisati incaataje iriori. Eiro icameetsatanajitsi irosati ontsitenijencaiteanaje.

²⁴“Ariorica irantero shirampari neaventachari, iquempeanacaro iriori; eiro icameetsatanajitsi oncarate 7 quitaiteri. Aisati onquempetanaquea iroori imaantari.

²⁵“Irompa iroorica tsinane irajatashitachari, te onquempetearoji oneaventasanotarica cameetsa, irosatirica oncanteani osamanitacote, eiro ocameetsatanajitsi.

²⁶“Jaocarica omairi aisati paitapeerica osavicanatayetari, eiro ocameetsatanajitsi, irosatirica oncantea irajate, oquempetaca oneaventasanotarica.

²⁷“Jaanicarica pamititaquerone ocapee, ocameetsati inquivajero iitsaare aisati incaataje iriori. Eiro icameetsatanajitsi irosati ontsitenijencaiteanaje.

²⁸“Ariorica ompeanajea oneaventa oncarate 7 quitaiteri, irosati oncameetsatanajea. ²⁹Iro pashini quitaiteri irosati aantaquea apite tooquiti, iriorica apite irijani paloma. Impojji amaqueneri antaveetatsiri piqueapinitiroca Pancotsi papatotimentantanari. ³⁰Irosati irantavaqueari aparoni iroimentenero caari cameetsatatsi, irioquea itsipa intaasanotenari. Aitaque incanteriri noameetsatantajarori tsinane mantsiatatsiri. ³¹Aitaque incanteari pishanincapee, eiroquea otimantayetatsi caari cameetsayetatsine, aisati eiroquea icamajeitantatsi incaariperotaquerorica Nonantari notimimotantimpiri.”

³²⁻³³Irotaque oca icantacantiri, ariorica imantsiati shirampari ishiramparitantariqui aisati yaparajatashitarorica, aisati iroori tsinane neaventachari. Jeri iriori shirampari, ariorica irantaquero ainirotatsirica oneaventa; eiro icameetsatanajitsi.

Quitaiteri ipeacotantarori Tasorentsi caari cameetsatatsi.

16 ¹⁻²Ari avisanaque icamantacari apite itomi Aarón. Iro icamantacari, iquempejitashitasanotacaró Inantari Tasorentsi. Ari iquenquetsatacaajiri Tasorentsi Moisesi, icantiri:

“Pincanteri pirenti, eiro iqueashitatsi Nonantariqui timatsiri araquerora oticaashiro otimantari Cajón, iquempejitarocari otataro; icamicari. Tempa aitaque ontimeri mencori nonijantempiri. ³⁻⁴Inqueanteari Aarón, incaatavaquetsita aisati inquitsaataquearo cameetsamaotatsiri jero itorosate iroicoteari, aisati ishiticatsaqui jero isavoinaro; tempa irotaque nonashitacaanariri. Aisati iraye aparo vacajaniqui iroimenterori caari cameetsatsi, aisati aparo ovisha intaasanoteri.

⁵“Aisati inquempetaquea iriori pishanincapee. Iramaqueneri Aarón apite chiivo, iroimenteneriri caari cameetsatsi yantayetiri, aisati aparo ovisha intaasanoteri. ⁶Impoiji iroyeri vacajaniqui, iroimenterori caari cameetsatsi yantayetiri iriori aisati yantayetiri ishanincasanoripee, nompeacotantajeantariri. ⁷Irosati iramantaqueari apiiteroqueti chiivo piqueapinitiroca Pancotsi papatotimentajeitantanari. ⁸Impoiji irovishonquimenteriri paitarica, iriotanteari jaoca itimiri irashitacayenari, aisati irashiteari Azazel. ⁹Yora chiivo irashitacayenari, iriotaque iroimenterori caari cameetsatsi. ¹⁰Irioquea itsipani chiivo irashi Azazel, eiro yoiritsi. Ocameetsati iramenari, nompeacotanteantariri yantajeitiri. Impoiji intianqueri anta caaraiteriqui.

¹¹“Yora vacajaniqui yoimentaquerori Aarón caari cameetsatsi, yantayetiri iriori aisati ishanincasanoripee, nompeacotantajeantariri. ¹²Irosati irantaquea otaapinitantari casancavaneri aisati iroaque omenqui paamari timatsiri antearoqui altar, irosati irantaquea iroori apivanete casancari tononcachari. Impoiji iranaquero ara oticaashiroqui nonantasanotari. ¹³Irosati intaavanetantaquearo oncatchajencatasantantanaqueari ampataanaquero otataro Cajón onantari Icantacantiri Tasorentsi. Aitaque incantaquerori, eiroquea icamantatsi. ¹⁴Aisati iraye capichaji iriraja vacajaniqui, irosati intsiquirijantaquearo iracotsapaquiqui araquerora otataroqui Cajón aisati acaqueroca, oncarate 7 irampiitaquero. ¹⁵Impoiji irisoquijanaque iroyeri chiivo, iroimentero caari cameetsatsi yantayetiri pishanincapee. Irosati impiantanajea tsompoina, iranaquero iriraja intsiquirijero jenioquiji otataroqui Cajón aisati acaqueroca. Inquempetacantaquero intsiquirijantacarori iriraja vacajaniqui. ¹⁶Aitaque oncanteari iroameetsatasantaquero Nonantari tsompoinaqui; tempa ocaariperotaquero yantayetiri maaroni pishanincapee. Aisati inquempetaquero iroori Pancotsi papatotimentajeitantanari, pisatecajeitaqueri aisati caariperotaquerori.

¹⁷“Tecatsiyea catsini queatsine Pancotsiqui Nonantariqui ainiroqueratatsirica Aarón tsompoina icantacoventiri nompeacotanteantariri yantayetiri iriori jeri ishanincasanoripee, aisati yantajeitiri maaroni pishanincapee. ¹⁸Intsoncanaquerorica, irosati irisoquijantanaquea iroameetsatantearori iroori altar. Impoiji iraye capichaji iriraja vacajaniqui jero iriraja chiivo, irosati impantantaquearo oshevatapeequi aisati acaquerocapeequi. ¹⁹Aisati intsiquirijantaquearo

iracotsapaquiqui, oncarataque 7 irampiipinitaqueru. Aitaque incanterori iroameetsatantearori; tempa ocaariperotaqueru yantayetiri pishanincapee.

²⁰“Ariorica intsoncayetaque Aarón iroameetsayetaqueru Nonantari tsompoinaqui, aisati papatotimentantanari, jero maaroni timayetatsiri aisati altar, irosati iramacantantaqueari chiivo aneatsiri. ²¹⁻²²Impoiji iroanquetero apiiteroqueti iraco iitoqui chiivo, incamantacotantayetearori caari cameetsatatsi yantayetiri pishanincapee. Irosati intiancantaquea aparoni aanaquerine, iroimpacanteariri caaraiteriqui. Aitaque oncanteari impeaquea chiivo caaraiteriqui tecatsinta timatsine, iraanaqueru maaroni caari cameetsatatsi. ²³Irosati inqueantanajea Aarón Pancotsi, isapocajero iitsaare cameetsamaotatsiri iquitsaataca iqueacaapinitiri Nonantariqui noameetsatasanotiri. ²⁴Aitaque incaateri aisati inquitsaatajea pashini, irosati irisotoantanajea iramanteariri irashi aisati irashi iriori ishanincapee intaasanoteri. Irosati nompeacotantajejanari caari cameetsatatsi yantayetiri aisati iriori pishanincapee. ²⁵⁻²⁶Irointiquea irejipee, ocameetsati intayero altariqui. Yora aanaquerine chiivo joquenerine caaraiteriqui, ocameetsati inquivajero iitsaare aisati incaataje, irosati inqueantapaajea pisavicajeitinta.

²⁷“Yora vacajaniqui jeri chiivo iqueacaanaqueri iriraja Nonantariqui, nompeacotantajejanariri caari cameetsatatsi, ocameetsati iraanaqueru otsapitapaaca pisavicajeitantari imeshina, ivatsa jero itiapee, intaanteariri. ²⁸Irioquea yora tayerine, ocameetsati inquivajero iitsaare aisati incaataje. Irosati inqueantapaajea pisavicajeitinta.

²⁹“Oca nocantacantiri, oncanteani onttime. Ariorica omoncaratapinitea 10 itaiterite cashiri sietetatsiri, ocameetsati pintijeitempa aisati eiro pantaveejititsi; aisati inquempejeitea iriori pashinisati saviquimojeitimpiri. ³⁰Tempa irotaque quitaiteri nopeacojeitimpirori caari cameetsatatsi pantimotaquenari, picameetsashirejeitantajari. ³¹Queario oncanteani oca nocantacantiri. Ora quitaiteri irotaque pashije nonashitacaquempiri, pimacoreajeitanteari aisati pintijeitanteari. ³²Yora antaveetatsiri nocoyeaqueri poyeetajearine iriri, iriotaque moncaraterone incantacoventeri pishanincapee, nompeacotanteanariri caari cameetsatatsi yantajeitiri. Aisati inquitsaatearo iitsaare tijachari lino cameetsamaotasanotatsiri nonashitacaari. ³³Iriotaque oameetsantajerone tsompoinaqui Nonanteari cameetsatasanotatsiri otiminta Cajón aisati maaroni papatotimentantanari jero altar. Aisati nopeacojeitanteanariri yantayetiri iriori aisati yantayetiri maaroni pishanincapee.

³⁴“Irotaque oca nocantacantiri, oncanteani onttime: aparopee osarentsi inqueapinite antaveetatsiri incantacoventapinintanteariri pishanincapee, nompeacotanteanariri caari cameetsatatsi yantajeitiri.”

Ari imataqueru Aarón icantaqueriri Tasorentsi Moisesi.

Apaniro oni Inantari Tasorentsi

17 ¹Ari icantiri Tasorentsi Moiseshi:
²“Pincanteri Aarón jeri itomipee aisati maaroni pishanincapee icantaque Tasorentsi:

³“Intimerica pishaninca oyerine vaca, ovisha iriorica chiivo, ⁴eirorica yamiritsi piqueapinitiroca Pancotsi papatotimentantanari, intaimotantenariri Nonantariqui, iriotaque cantacaashitearone; tempa yaparajatashitacaro iriraja. Eiro meeca ishanincatanajaritsi Tasorentsi. ⁵Irotaque otimantari oca nocantacantiri, eiro yoashitaritsi ivira jaocapeerica. Ocameetsati irameneri antaveetatsiri piqueapinitiroca Pancotsi, iroantenariri naacameetsatantajariri. ⁶Iraantavaquearori antaveetatsiri iriraja, intsiquirijantearori altar timatsiri piqueapinitironta Pancotsi papatotimentantanari, aisati intaantenarori ireji noneacameetsajencatasanotiri. ⁷Oca nocantacantiri oncanteani ontime, eiroquea itaantayetajanaritsi aisati camaaripee antacaayevetacariri paitapeerica. Ocameetsati pimoncarajeitero oca, aisati iriori pishanincajeitajeari.

⁸“Noncantasanotempi aisati: Iriorica pishaninca, iriorica pashinisati saviquimojetimpiri, ariorica iroashiyeteari jaocapeerica, ⁹eirorica yamiritsi Pancotsi yapatotimentantanari, intaantenariri; eiro icaratajiritsi ishanincapee.

Te incoacanteroji Tasorentsi iroyeetearo iririja poshiniripee.

¹⁰“Aisati te noncoacayeri maaroni pishanincapee jeri pashinisati saviquimojeitimpiri iroyeetearo iriraja poshiniripee. Jaanicarica oaquearone, nojocajeri eiro icaratajiritsi ishanincapee. ¹¹Tempa irotaque iriraja oaneiriri maaroni. Irotaque pisaitapinitantearori altar pimpinacoventerori caari cameetsatsi, nompeacojeitantempirori, eiroquea picamajeitantatsi.

¹²“Irotaque nocantantimpiri: Eiro catsini poajeitarotsi iriraja, aisati iriori saviquimojeitimpiri. ¹³Jaanicarica quenaveetatsine, iriorica pishanincapee iriorica saviquimojeitimpiri, ariorica inquente camatsatsiri iriorica vanquitachari, yoyeetari; ocameetsati irojoquero iriraja, intijanaquero quipatsiqui. ¹⁴Tempa irotaque oaneiriri maaroni timayetatsiri. Irotaque nocantantimpiri: Eiro poajeitarotsi iriraja. Jaanicarica oaquearone, ontimatiye irojocayeeteri.

¹⁵“Jaanicarica oayetearine poshiniri camashitachari, iriorica yorantacari maniti, ocameetsati inquivajero iitsaare aisati incaataje iriori. Eiro icameetsatanajitsi irosati ontsitenijencaiteanaje, impojji incameetsatanaje. ¹⁶Irompa eirorica iquivajirotsi iitsaare aisati eirorica icaatajitsi, irisati cantacaashitearone.”

Te incoacantero Tasorentsi antashiyetearone tsinaneppee.

18 ¹⁻²Ari iquenquetsatacaajiri Tasorentsi Moiseshi icantiri:
 “Pincanteri pishanincapee, narotaque Tasorentsisanori Pitasorentsite.

3“Eiro pantayetirotsi yantayetiri egiptosatipee pisaviquimoveitaniri.

“Eiro pantayetirotsi yantayetiri iriori savicajeitatsiri quipatsiqui Canaán naajeitanajempinta pisavicajeitantapaajeari, aisati eiro pantayetirotsi icantacantayetiri.

4“Ocameetsati pimocaratero nocantacantayetiri, pisavicajeitanteari cameetsa; tempa narotaque Tasorentsisanori Pitasorentsiste. 5Irotaque nocantantimpiri pimatasanoyetero nocantacantayetiri. Yora moncarataquerone oca, iraneajeitanaje. Tempa narotaque Tasorentsi.

6“Te oncameetsateji pantayetero tsinane pishanincasanoripee; narotaque Tasorentsisanori cantimpiri.

7“Eiro pitseenquiritsi piri, pantantayeteorori piniro; tempa irotaque pinirosanori. Te oncameetsate pantero.

8“Eiro pitseenquiritsi piri, pantacoyeteri ijina.

9“Eiro pantayetirotsi pitsiro aisati: iroorica irishinto piri aisati iroorica ishinto pinirotsori savicatsiri pashiniqui pancotsi. Eiro pantayetirotsi.

10“Eiro poashiventaatsi avisati pantayetero pisaro, irishinto pitomi, iroorica ishinto pishinto. Te oncameetsate pantayetero.

11“Eiro pantayetirotsi oshinto pinirotsori, ijina piri; tempa irotaque oquempetaro pitsiro.

12-13“Eiro pantayetirotsi paio, aisati pinirotsori; tempa irotaque oshanincasanoripee piri jero aisati piniro.

14“Eiro pitseenquiritsi piritrosori, pantacoyeteri ijina; tempa irotaque pinirotsori.

15“Eiro pantayetirotsi paniro; tempa irotaque ijina pitomi.

16“Eiro pitseenquiritsi pirenti, pantacotanteariri ijina.

17“Eiro pantayetirotsi ishinto, teerica, osaro ora tsinane pantaqueri. Tempa oquempetaca pantaquero pishintosanori, te oncameetsateji catsini.

18“Eiro paajirotsi ireento pijina aisati eiro pantirotsi ainiroquera anei pijina, oquisavacaacari.

19“Eiro pantayetirotsi tsinane ariorica oneaventa.

20“Eiro ponairotsi ijina pishaninca aisati eiro pantirotsi, eiroquea picariperotacantantsi.

21“Eiro catsini poayetiritisi pitomi, pintaanteanariri ijitasorentsitashiyeetari Moloc. Ari poashiventaakuena; tempa narotaque Tasorentsi.

22“Eiro poonairitsi pishiramparirinte pinquempetacantanteariri poonairo tsinane. Ora pantaniroteri, te oncameetsateji catsini.

23“Eiro pantayetiritisi virantsi, picariperotacantacari. Aisati onquempetea tsinane, eiro antacaayetaritsi virantsi. Ora pantaniroteri, te oncameetsateji catsini.

24-25“Eiro catsini poariperotacantatsi pantayeterorica ocapee. Irotaque yoariperotacantajeitantacari savicayetatsiri nampitsipeequi yora noshinetempiri pintsoncajeiteri. Aisati oquempetaca iroori

iipatsite ocaariperotanaque. Irotaque noasanquetamentanteariri yantajeitaqueri; oquempetaca ojocaqueri iipatsite. ²⁶Avirojei aisati pashinisati saviquimojeitimpiri, nococaaquempi pimajeitero maaroni nocantacantiri; eiro pantayetirotsi catsini caari cameetsatatsi. ²⁷Maaroni oca caari cameetsayetatsi, irotaque yantajeitiri savicajeitatsiri aca. Irotaque caari ocameetsatantanaja quipatsi. ²⁸Te noncoyeji pinquempajeiteari avirori, picariperotirocari quipatsi. Noquempetacantimpicari savicajeitatsiri, nojocaqueri. ²⁹Jaanicarica antayetaquerone caari cameetsatatsi, ontimatiye irojoqueeteri, eiro icarajeitiritsi ishanincapee. Narotaque Pincatsari Pitasorensite. ³⁰Narotaque Tasorensisanori Pitasorensite, irotaque nocantantimpiri pimatanojeitero oca nocantacantiri. Eiro pantayetirotsi caari cameetsatatsi yantajeitiniri savicajeitatsiniri, ocaariperotacaimpicari.”

**Icantacantiro Tasorensi irantayeteri ishanincapeeni
Israel, irisavicajeitanteari cameetsa.**

19 ¹Ari iquenquetsatacaajiri Tasorensi Moiseshi icantiri:

²“Jeroca pinceririri pishanincapee.

“Pincameetsashiretanojeitanaque avirori; tempa narotaque Tasorensisanori Pitasorensite, nocameetsasanaotaque.

³“Pimpincatsajeiteri piri aisati piniro.

“Aisati pimocarajeitero quitaiteripee nonashitacaacari pimaoreantapinijeitearo. Narotaque Tasorensisanori Pitasorensite.

⁴“Eiro paventaritsi pijitasorensitashiyetari. Eiro povetsicashiyetatsi paitapeerica pijitasorensitantearori. Tempa narotaque Tasorensisanori Pitasorensite.

⁵“Ariorica pamayetenari poimenterori naacameetsatantajempiri, ocameetsati pimocaratananotero nocantaquempiri, noneacameetsatantempiri. ⁶⁻⁷Yora pamayetenari, ocameetsati poyeari quitaiteriqui poantacariri. Aisati ocameetsati poanontajea poamanajeari. Ariorica irimavatacotaque quitaiteri, ocameetsati pintaajeri. Poaquearirica, eiro noneacameetsatiritsi. ⁸Yora oaquearine timanaque irantane; tempa icariperotaqueri nonashitacaavetari. Ontimatiye eiro icaratajimpitsi.

⁹“Ariorica omoncaratea paviitantarori pivanquire, eiro pitsoncasanotirotsi overapaaca poane, aisati eiro picoyeasanoyetirotsi oitsoqui timaarantanaintsiri. ¹⁰Aisati otimirica poovamashite, eiro paviitasanoyetirotsi oitsoqui aisati eiro paayetirotsi pariiquiyetatsiri. Ocameetsati pojocanaqueneri pishanincapee aisati pashinisatipee caari otimimotasanoyeti paitapeerica. Tempa narotaque Tasorensisanori Pitasorensite.

¹¹“Eiro picoshititsi, eiro pitseeysatsi, aisati eiro pamatavitavacaajeitatsi.

¹²“Eiro picantamempearitsi pishanincapee novajiroqui, pamatavitanteariri; picaariperotirocari novajiro. Tempa narotaque Tasorentsi.

¹³“Eiro pishintsinatiritsi pishaninca, aisati eiro paitiritsi yashiyetari. “Eiro picantiritsi antaveetimpiri: ‘Osaitequera nompinatamanajempi.’ Ocameetsati pimpinatiteari.

¹⁴“Eiro poamaimatiritsi mayempiri. “Eiro poashiyetiritsi maviteajari iravoqui paitapeerica intsitincanteari. Ocameetsa pimpincatsatena. Tempa narotaque Tasorentsi.

¹⁵“Eiro picantacoventantashiyetatsi. Eiro pamitacotashiyetaritsi caari neaperotacha aisati eiro pineapincatsatashitaritsi neaperotachari. Irointi pincantacoventantasanote cameetsa.

¹⁶“Eiro piquenacayetirotsi tseyantsi poanteneeriri pishanincapee. “Eiro picaratiritsi itsipa oayetiriri pishaninca. Narotaque Tasorentsi. ¹⁷“Eiro piquisanentiritsi pishaninca. “Otimirica irantane, ocameetsati pincantimenter, Eirorica picantiritsi, piquempetacari iriori, pantaquero caari cameetsatatsi.

¹⁸“Eiro pipiatantatsi aisati eiro piquisanentashitaritsi picarajeitiri. Pininteri pishaninca, piquempetaca pinintaja avisati. Tempa narotaque Tasorentsi.

¹⁹“Pimatasanojeitero nocantacantiri. “Eiro pishinetiritsi pivacate iroavitearo pashinipee virantsi, inashiyetanacari irijani.

“Eiro pipanquiyetitsi poanequi pashiniyetatsiri panquirentsi, oconoayetananacari.

“Eiro piquitsaatarotsi quitsaarentsi conoayetachari paitapeerica. ²⁰“Intimerica anterone nampirentsi, icashiacayeevetariri pashini shirampari, caariquera ipinacoventeeti aisati ainiroquera iperanayeetaro; ocameetsati impinaventajero. Eiro poacantiritsi; tempa irointi peranarontsi. ²¹⁻²²Yora antaquerori, ocameetsati iramaje aparoni ovisha piqueapinitiroca Pancotsi papatotimentantanari, iroimentajerori yantaqueri. Impojji incantacoventajeri antaveetatsiri, irosati nompeacotantajejanari yantaqueri.

²³“Ariorica pareejeitaquearo quipatsi, pimpanquiyetapeerica pichochoquimashite, eiro poitarotsi oitsoqui oncarate mava osarentsi. Pinquempetacantero te oncameetsateji. ²⁴Ariorica oncaratapaaque 4 osarentsi, ocameetsati payero oitsoquipee pashitacayenaro, pimpasonquitantenari. ²⁵Iroquea oncaratapaaquerica 5 osarentsi ontimasananotanaque oitsoqui, impojjiquea poajeitearo avirori. Tempa narotaque Tasorentsisanori Pitasorentsite.

²⁶“Eiro poacotarotsi poshiniri iriraja. “Eiro picoitsi pisheripiarite, aisati eiro picoitsi piotashiyetearo avisayetatsineri coajicani.

27“Eiro pameetirotsi piishi pincaarapatiitotanteari, aisati eiro pitotirotsi overaapaaca pishipatona.

28“Eiro pitoyetirotsi pivatsa ariorica pincamaarante. Aisati eiro pisatoncaatacoyetarotsi shiacantsi pivatsapeequi. Tempa narotaque Tasorentsi.

29“Eiro pishinecoventirotsi pishinto ompempa antashiyetariri shiramparipee, picaariperotirocari. Otimasananaquecari caari cameetsatsi piipatsitequi.

30“Pimaoreantapinijeitearo quitaiteri sábadó nonashitacaari, aisati pimpincatsatero Nonantari. Tempa narotaque Tasorentsi.

31“Eiro paventaritsi quenquetsatacairiri camayetatsiri aisati iotashiyevetaroni paitapeerica. Tempa ari nonquempetacantaquempi pipitsitasanotaque. Tempa narotaque Tasorentsisanori Pitasorentsite.

32“Ocameetsati pimpincatsateri anteashipari, aisati narori pimpincatsatena. Tempa narotaque Tasorentsi.

33“Eiro poashinoncairitsi pashinisati saviquimojeitimpiri.

34Pinquempetacanteri pishanincasanori, ocameetsati pincavintsayeri oquempetaca picavintsaajeitaja avisati. Tempa piquempejeitacari iriori pashinisati pinajeitaque pisavicantajeivetacaniri Egiptoqui. Narotaque Tasorentsisanori Pitasorentsite.

35“Eiro pamatavitavacantarotsi moncaramentotsiyetatsiri: iroorica metro, tenayetatsiri jero litropee. 36Ocameetsati pimincarantearo cameetsa moncaramentotsipee, tenatatsiri aisati tsantsatatsiri. Narotaque Pincatsari Pitasorentsite oimishitoajimpiri Egiptoqui.

37“Irotaque nocantantimpiri pimatanojeitero nocantacantiri, pimocarajeitero maaroni. Narotaque Tasorentsi.”

Iroashinoncayeri Tasorentsi piatsatariri.

20 ¹Ari iquenquetsatacaajiri Tasorentsi Moisesi icantiri:

²“Jeroca pincanteriri pishanincapee: Intimerica pishanincapee aisati iriorica pashinisati saviquimojeitimpiri, tayenerine itomipee ijitasorentsiyeetiri Moloc, ocameetsati impicheeri picarajeitiri. ³Aitaque noasanquetaaqueri, nontsoncaqueri, eiro itimajitsi. Tempa icariperotaquero Nonantari aisati icariperotaquero Novajiro; itseencasanotaquena.

⁴⁻⁵Ariorica iramenashijeitaqueari, teerica incoyeji iroyeri, irosati noasanquetantaqueari iriori aisati ishanincasanoripee. Aitaque nompoyeraqueri nontsipataaqueri icarajeitakeri icariperojeitacaacari Moloc. ⁶Aisati intimerica aventearine ishira camayetatsiri, aisati iotashiyevetaroni paitapeerica; tempa iquemisantashitacari icariperotaca irisati. Aitaque noasanquetaaqueri, nontsoncaqueri eiro itimajitsi.

⁷“Pinashitasanojeitanaquea aisati pincameetsashiretasanotanaque. Tempa narotaque Tasorentsisanori Pitasorentsite. ⁸Pimatanojeitero

nocantacantiri, pimoncarajeitero. Tempa narotaque Tasorentsisanori nashitacaasanotaquempiri.

⁹“Jaanicarica oamaimaterine iriri iroorica iriniro, ocameetsati iroyeeteri. Irisati oacantajanchane; tempa icantimataqueri iriri.

¹⁰“Intimerica antacoterine ijina ishaninca, yaimentacaro ijina aisati aimentacari ojime. Ocameetsati iroyeeteri apiiteroqueti.

¹¹“Intimerica oonaiterine ijina iriri, te impincatsateri irisanori, ontimatiye iroyeeteri apiiteroqueti. Irisati oacantajanchane.

¹²“Intimerica anterone iraniro, ocameetsati iroyeeteri apiiteroqueti. Irisati oacantajanchane; tempa yantasanotaquero catsini caari cameetsatatsi.

¹³“Intimerica oonayerine ishramparirinte inquempetacantero tsinane, ontimatiye iroyeeteri apiiteroqueti Irisati oacantajanchane; tempa yantasanotaquero catsini caari cameetsatatsi.

¹⁴“Intimerica shirampari jinantearone irishinto aisati iniro, yantasanotaquero catsini caari cameetsatatsi. Ontimatiye irojoqueeteri paamariqui intayeeteri aneatsiquera, eiroquea ishequiantanacatsi antayeterone caari cameetsatatsi picarajeitiri.

¹⁵“Intimerica antayeterine virantsi, ocameetsati iroyeeteri, aisati iriori virantsi.

¹⁶“Ontimerica tsinane antacaayetearine virantsi, ontimatiye iroyeetero aisati iriori virantsi. Irosati oacantajanchane.

¹⁷“Intimerica jinantajearone iritsirosanori, iroorica iritsirosori; tempa yantajiro ishanincasanori; yoashiventaajeitaqueri ishanincapee. Ontimatiye intianqueeteri jaocarica, irineajeitanteariri maaroni. Tempa yantasanotaquero caari cameetsatatsi; irisati cantacaacaro.

¹⁸“Intimerica oonayerone tsinane neaventachari, yantacotitaquero iraja, ontimatiye intianqueeteri apiiteroqueti jaocarica. Eiro icarajeitajiritsi ishaninca.

¹⁹“Eiro pantayetirotsi pinirotsori aisati paio; tempa irotaque pishanincasanori. Yora antaquerone ishanincasanori, apiiteroqueti irashinoncaimentearo caari cameetsatatsi.

²⁰“Intimerica oonaiterine iriritsori ijina, te impincatsateri. Timanaque irantane apiiteroqueti. Incamashitaquea, eiro itimitsi itomipee.

²¹“Intimerica aapitsaterine ijina irirenti, te impincatsateri. Te oncameetsateji catsini yantaqueri. Eiro itimitsi itomipee.

²²“Ocameetsati pimasanojeitero nocantacantiri. Pimoncaratero maaroni, eiroquea nojocantimpitsi piipatsitequi, naanajempita pisavicajeitantapaajeari.

²³Eiro pantayetapairotsi yantajeitiri atiripee savicayetsisiri. Te oncameetsateji catsini yantapinjaitiri, eiro namavetajirotsi. Irotaque nojocanteariri. ²⁴Tempa nocashiacaasanotaquempiro pashijeitajearo isavicantajeivetari. Narotaque pempirone quipatsi pisavicajeitantajeari, oshiocasanoyetapai paitapeerica panquirentsiyetatsiri.

“Tempa narotaque Tasorentsisanori Pitasorentsite nashitacaaquempiri, te pinquempejeiteariji itsipapee atiri. ²⁵Irotaque ocameetsatantari avirori pinashitacayeteari poshiniripee pintayenari aisati caari pintayena: camatsayetatsiri, vanquiyetachari, noshicayetachari aisati cameetsatsiri, caari cameetsatatsi jeri yoyeetari aisati caari yoyeeyeta; eiro picaariperotacaaritsi. ²⁶Ocameetsati pincameetsatasanojeitanaque; tempa narotaque Tasorentsisanori nocameetsatasanotaque narori. Nonashitacaaquempi noshanincatasannotantempiri. Te pinquempejeiteariji pashinisatipee atiri.

²⁷“Yora shirampari iroorica tsinane itimantacari camaari, aisati iotashiyetarori paitapeerica avisayetatsine; ontimatiye impicheeri irosati incamantaquea. Irisati oamaacantajanchane.”

Irimoncarateri antaveeyetatsiri.

21 ¹Ari icantajiri Tasorentsi Moisesi:
 “Pincanteri antaveeyetatsiri, itomipee Aarón: Eiro icaariperotacaaritsi ishanincapee camayetatsiri. ²⁻³Irintiquea ishanincasanoripee: iniro, iriri, itomi, irishinto, irirenti, iroorica iritsiro caari aatsine ojime saviquimotiriri; iriojeitaque irishineteri incaariperotacayeari. ⁴Irointiquea pashini ishanincasanori aatsiri ojime, eiro icaariperotacaarotsi. ⁵⁻⁶“Eiro yameetirotsi iishi jero ishpatona, aisati eiro itoyetatsi ivatsapeequi. Ocameetsati incameetsatimentasanotena, eiro icaariperotirotsi novajiro; tempa iriojeitaque taapinitenarine icashiacaajeitanari. Irotaque nocoacantacariri incameetsatasanotanaque. ⁷“Eiro yairotsi antashiyetariri shirampari, yajiricashiyetari aisati jocayetiriri ojime. Tempa nonashitacaasanotacariri. ⁸Pincantasanoteri eiro yantayetirotsi ocapee. Tempa iriojeitaque vanquenarone oanarontsi icashiacyeetanari. Ocameetsati incameetsatasanotanaque, narotaque oameetsatanoterine. Tempa naro Tasorentsisanori, nocameetsatasanotaque narori. ⁹“Ariorica antacaajeari irishinto antaveetatsiri, oquempetacantaca antashiyetariri shirampari, te ompincatsateri iri. Ontimatiye intayeetero aneatsiquera. ¹⁰“Yora jivatiriri antaveeyetatsiri, iriotaque ijivayeetaqueri isainayeetaqueri iitoqui quejitsi nonashitacaari, iriotaque quitsaatarori cameetsamaotasantatsiri. Te oncameetsateji irisavoinareacotero iishi, aisati eiro itsereirotsi iitsaare iriraacotanteariri camatsiri. ¹¹Omavetaquea iriorica iriri, iriniro; eiro ijatashitiritsi icaariperotacaaricari. ¹²Aisati eiro isotoitsi Nonantariqui ariorica irantaveete, icaariperotirocari. Tempa isaiyetaquero iroori quejitsi nonashitacaari, yoameetsatasanotantacarori. Tempa narotaque Tasorentsisanori. ¹³“Ocameetsati iraye tsinane evancaro caariquera neerine shirampari. ¹⁴⁻¹⁵Eiro catsini ijinantarotsi camajimentaaro, iroorica jocayetiriri ojime,

yajiricashiyeetari aisati iroorica antashiyetariri shirampari. Ocameetsati ijinantearo evancaro ishanincasanori, eiroquea icariperotacantaritsi irishanincajeitajeari. Tempa narotaque Tasorentsisanori nashitacaajeitacairiri.”

Te incoyeji Tasorentsi irantaveete amashiyetachari Inantariqui.

¹⁶Ari icantajiri Tasorentsi Moiseshi:

¹⁷“Pincanteri pirenti: Yora ishanincajeitari meeca aisati irishanincajeitajeari coajicani, yamashiyetarica, te noncoacayeriji intayetenari virantsi yameeyetanari. ¹⁸⁻²¹Iquempetaca iriorica: maviteajari, mayejaari, amashitachari iirinaqui, iyempitaqui, carajayetatsiri ivoripeequi, iracojempequiqui, morintetatsiri itapiiqui, caramataquitatsiri, camarajaquitatsiri iroqui, patsetatsiri, patsaayetsatsiri aisati aitsoquireari ishiramparitantari; eiro catsini imatatsi irijate intayetenaro iriori yameeyetanari aisati oanarontsi icashiacyeetanari. ²²Ocameetsati iroyearo irointi oca oanarontsi cameetsatasanotatsiri, nonashitacaari. ²³Iro cantaincha eiro ijatitsi oticaashiroqui Nonantari, aisati eiro iquempejitarotsi altar icariperotirocari. Tempa narotaque Tasorentsisanori nashitacaacarori.”

²⁴Ari imataquero Moiseshi yovaajiniri Aarón jeri itomipee aisati maaroni ishanincapee.

Iraamaventacotearo yamayetiniriri Tasorentsi.

22 ¹Ari iquenquetsatacaajiri Tasorentsi Moiseshi icantiri:

²“Pincanteri Aarón aisati irishanincajeitajeari, ocameetsati iramaventacotearo cameetsatasanotatsiri inashitacaanari ishanincajeitaniri Israel. Eroquea icariperotimotantanarotsi. Tempa narotaque Tasorentsisanori.

³“Pincantajeiteri meeca aisati coajicani yora irishanincajeitajeari, ariorica icariperotaca iromaquenarorica cameetsatasanotatsiri inashitacaayetarori ishanincajeitaniri Israel; te oncameetsateji. Ocameetsati pojoqueri. Narotaque Tasorentsisanori cantatsiri.

⁴“Eiro itimitsi irishanincajeitajeari Aarón mantsiati aaqueririca patsaarontsi, teerica, yaparajatiro ishiramparitantari. Eiro yoarotsi paitapeerica cameetsatasanotatsiri inashitacayeetanari. Irosati iravisacotantajeari.

“Yora antaquerine caariperotacantatsiri, iriorica camatsiri, teerica, yantitaqueri aparajatirori ishiramparitantari, ⁵irompa icariperotacaacaririca, yantaqueri noshicayetachari, teerica, yantaqueri shirampari mantsiatatsiri; irotaque eiro icameetsatananjatsi. ⁶⁻⁷Eiro icameetsatanajitsi irosati ontsitenijencaiteanaje, aisati eiro yojarotsi inashitacaayeetanari, tequerarica inquivajea. Ariorica inqueanaje

catsirincaiteri, cameetsatanaji ini. Impoijiquea iroajeero cameetsatsiri inashitacaayeetanari; tempa irotaque yopinitari. ⁸Te oncameetsate iroyeari ivatsa camashiyetachari, iriorica yatsicayetiri maniti, icaariperotacaaricari. Tempa narotaque Tasorentsisanori.

⁹“Pincanteri, ocameetsati irimoncaratero nocantacantiri, eiroquea otimantatsi irantane aisati eiro icamajeitantsi. Tempa narotaque Tasorentsisanori nashitacaariri.

¹⁰“Te oncameetsateji iroyearo oanarontsi nonashitacaari caari antaveetatsine, aisati maimotiriri ivancoqui jeri iveranaro.

¹¹“Ariorica iramanante antaveetatsiri iveranaro, ocameetsati iroyearo nonashitacaari, aisati maaroni itomipee timaintsiri ivancoqui.

¹²“Otimirica irishinto antaveetatsiri aaquerica ojime caari ishanincasanori, eiro yoarotsi ipeeyetiriri antaveeyetatsiri. ¹³Irompa ariorica incamaque ojimeni, teerica yojocashitajaro, aisati te intime otomipee, ompianajerica ivancoqui iri oquempetaca osavicashitani; ocameetsati oacotajeari yoari. Irintiquea itsipasatipee caari antaveeyetatsi, eiro catsini yoarotsi.

¹⁴“Jaanicarica oashitaquearone nonashitacaari, ocameetsati iroimpajeneri antaveetatsiri yoitacariri, iroanaajeneri aisati capichaji. ¹⁵⁻¹⁶Eiro ishinetiritsi antaveetatsiri ishanincapee incaariperotacantero paitapeerica ipaquenari, otimasanoticari irantane iroaquearorica cameetsatasanotatsiri. Tempa narotaque Tasorentsisanori nashitacaacarori.”

Cameetsayetatsiri virantsi iramayeteri.

¹⁷Ari icantiri aisati Tasorentsi Moiseshi:

¹⁸“Pinquenquetsacayeri Aarón aisati itomipee, jeri aisati maaroni pishanincapee; pincanteri: Ariorica intaasanotenari ivira pishaninca aisati pashinisati saviquimojeitimpiri, irimoncaratero icashiacaanari aisati iriorica ipashitanari; ¹⁹⁻²⁰ocameetsati iramaque aparoni shirampari vaca, iriorica ovisha jeri chiivo. Ocameetsati iramaque cameetsatasanotatsiri noneacameetsatanteariri. Eiro yamashitaritsi amashitachari; eiro noneacameetsatiritsi.

²¹“Ariorica iramayetena iroimenterori naacameetsatantajeariri, irompa iroorica irimoncaratero icashiacaanari aisati iriorica ipashitanari; ocameetsati iramaque vaca iriorica ovisha caari amashitacha, noneacameetsatanteariri. ²²Te oncameetsate iramenari maviteajari, piticayetachari, caarapontsoquiri, matsari, patsetyatsiri aisati quitejayetatsiri imeshinaqui. Eiro itaayetanaritsi altariqui yocapee. ²³Ariorica iramashitenari vaca, iriorica ovisha, teerica omoncaratavacayeaji iiti yamashiquitaca, cameetsataque. Iro cantaincha iroorica iramimentero irimoncaratantearomeri icashiacaanari, eiro noneacameetsatiritsi. ²⁴Aisati eiro yamanaritsi amashitachari iyashiitsoqui, aisati yaitsoquiyetiri. Eiro pamashiyetanaritsi piipatsitequi

pisavicajeitapaajenta. ²⁵Aisati eiro yairitsi amashiyetachari, impayeveteariri pashinisati incashiacantenariri, eiro noneacameetsatiritsi.”

Irineacameetsatanteariri Tasorentsi virantsi iroyeneriri.

²⁶Ari icantajiri Tasorentsi Moiseshi:

²⁷“Ariorica intimanaque vacajaniqui, iriorica ovishajaniqui jeri chiivojaniqui, intimavaquetsita iriniroqui irantsotavaquetsita oncarataque 7 quitaiteri. Ariorica oncaratapaaque 8 quitaiteri noneacameetsataqueri, moncarataca pintaantenariri.

²⁸“Eiro pitsonquitaritsi iroyeri aparoni quitaiteriqui vaca, iriorica ovisha jeri aisati irijani.

²⁹“Ariorica pamenari pimpasonquitantenari, ocameetsati pimoncaratenaro nocoacaquempiri, noneacameetsatantempiri. ³⁰Aisati ocameetsati poyeari quitaiteriqui poantaquenariri, eiro poanontajatsi poamanajeari. Tempa narotaque Tasorentsisanori.

³¹“Ocameetsati irimatasanojeitero nocantacantiri, aisati irimoncaratero maaroni. Tempa narotaque Tasorentsisanori.

³²⁻³³“Eiro piquempetacantanatsi paitapeerica, ocameetsati pimpincatsatasanojeitena. Tempa narotaque Tasorentsisanori nashitacaquempiri. Narotaque Tasorentsisanori oimishitoajeitajimpiri peerani Egiptoqui, Nontasorentsitantempiri.”

Quitaiteri irimaoreapinijeitanteari.

23 ¹Ari icantajiri Tasorentsi Moiseshi:

²“Pincanteri pishanincapee: Jero oca quitaiteri inashitacaacari Tasorentsi. Te onquempetearoji otsipapee quitaiteri, ocameetsatasanotaque. Irotaque pampatotimentapinijeitanteariri.

³“Ocameetsati irantaveetapinijeite oncarate 6 quitaiteri. Iro 7 quitaiteri, irimaoreajeite. Eiro yantaveetantarotsi, irointi irampatotimentajeitena jaocapeerica irisavicayeteri. Oca quitaiteri irotaque irimaoreantapiniteari aisati impincatsatantenari.

⁴“Irotaque oca quitaiteri nonashitacaari, ocameetsatasanotaque. Irotaque irampatotimentapinijeitantenari inquimoshireventajeitena, impincatsajeitena.

Inquimoshireventapinitantearori Yavisantaniri.

(Núm. 28.16-25)

⁵“Yora intanajarori aparo cashiri, iro 14 quitaiteri, ariorica irishaavijiiteanaje, inquimoshireventero Yavisantaniri, impincatsatantenari. (Icanteetiro oca Pascua.)

⁶“Iro 15 quitaiteri irisati cashiri, inquimoshireventero iroori tanta caari conoacha tapiacaarori, impincatsatantenari. Oncarate 7 quitaiteri

iroapinitearo tanta caari tapiacha. ⁷Ora quitaiteri irintanaquearori inquimoshireventero, irimpatotimentajeitavaquearotsita, eiro catsini yantaveejititsi. ⁸Aisati irintanaquearo intaapinitenari yamayetanari, irosati omoncaratanteari ⁷ quitaiteri. Impoiji irimpatotimentajeitena maaroni catsini. Tecatsi antaveetatsine.”

Inquimoshiventapinitantearori intarori yaviitiro ivanquire.

(Núm. 28.26-31)

⁹Icantiri aisati Tasorensi Moisesi:

¹⁰“Jero oca pincanteriri pishanincapee: Ariorica irareejeitaquearo quipatsi nomperiri, iraviyeterorica itiricote, ocameetsati iramaqueneri antaveetatsiri intarori oanayeta ivanquire iroisovatitanaquero. ¹¹ Ariorica onquitaiteamanaje quitaiteri pimaoreajeitantari, impoiji irayero antaveetatsiri iroanquenaro inashitacaanari noneacameetsatantearori. ¹² Ariorica iramaquero tirico oisovatitachari, aisati iramaque aparo ovishajaniqui cameetsatasanotsiri moncarataquerori aparo irosarentsite. Iriotaque intaasanotenari impincatsatantenari. ¹³ Aisati iramaque 4 kilo ari nianqui cameetsavanetatsiri tirico conoavatsatachari quejitsi, aisati iramaque aparo litro ovaja irisaitantavaquearori intayenari, noneacameetsajencatasanotantearori. ¹⁴ Tequeratsitarica iramayetenaro ocapee, eirotsita yoajeitarotsi vetsicachari tanta aisati tirico tashiiquitachari jero janaquiro. Oca nocantacantiri, oncantaitatiyempani. Irotaque irimoncarajeiteri irishanincajeitajeari jaocapeerica irisavicayeteri.

Iriveshireimentapinitearo omoncaratearica 50 quitaiteri.

¹⁵“Ariorica avisanaque quitaiteri imaoreantari yamantaquenarori oisovatitachari tirico, onquitaiteamanaquerica; aitaque irintanaquearori irimoncaratero ⁷ tomincopee. ¹⁶ Irosati omoncaratantajeari quitaiteri imaoreajeitantari, irotaque omoncaratanteari ⁵⁰ quitaiteripee. Impoiji iramajenaro aisati iroaquerari tirico inashitacaanari. ¹⁷ Aisati iramayetaque ivancoqui apitepee tanta vetsicachari tirico cameetsavanetatsiri, conoachari tapiacaarori, oncarate 4 kilo aparopeeni. Irotaque incashiacyenari jivatatsiri oitsoquiyeti ivanquirepee. ¹⁸ Ariorica iramaque tantapee, aisati iramaque ⁷ ovishajaniqui caari amashiyetacha moncarataquerori aparo irosarentsite; aisati aparo vacajaniqui jeri apite ovisha, intsipataaquero ivanquire jero ovaja. Iriojeitaque intayenari, noneacameetsajencatantearori.

¹⁹“Aisati iramaque chiivo iroimentajerori caari cameetsatsi, jeri apite ovisha moncarataquerori aparo irosarentsite, iroimentajerori, naacameetsatantajeariri. ²⁰ Impoiji irayeri antaveetatsiri apiitero ovishajaniqui, iroanquenari aisati intsipataaqueri tantapee. Irotaque nonashitacaanariri iriori antaveetatsiri.

²¹ “Irotaque oca quitaiteri irampatotapinijeitanteari inquimoshireventajeitero. Eiro yantaveejeitantaró paitapeerica. Oca nocantacantiri oncantaitatiyempani. Irotaque irimoncarajeitajeri irishanincatajeari jaocapeerica irisavicayeteri.

²² “Ariorica omoncaratea iraviitantearori ivanquirepee, eiro itsoncasanotirotsi iraviitero overapaaca iroane. Aisati eiro icoyeasanoyetirotsi oitsoqui timaarantanaintsiri. Ocameetsati irojocanaqueneri ishanincapee aisati pashinisati caari otimimotasanoti paitapeerica. Tempa narotaque Tasorentsisanori Pitasorentsiti.”

Inquimoshireventantearori itiotanteetarori tiorentsi.

(Núm. 29.1-6)

²³ Ari icantiri Tasorentsi Moisesi:

²⁴ “Jero oca pincerteriri pishanincapee: Ora intanajearene quitaiteri, sietetapaatsiri cashiri, aparo quitaiteri pimaoreajeitantari nonashitacaari, ocameetsati pampatojeitea maaroni pinquimoshireventajeitero itiotanteetarori tiorentsi. ²⁵ Aisati irotaque intaantenariri ivira impincatsatantenari. Eiro catsini yantaveejeitantarotsi.”

Quitaiteri ipeacotantarori Tasorentsi caari cameetsatsi.

(Núm. 29.7-11)

²⁶ Icantiri Tasorentsi Moisesi:

²⁷ “Irisati cashiri sietetatsiri, iro 10 quitaiteri, irotaque quitaiteri nompeacotantempirori caari cameetsatsi. Ocameetsati irampatotimentajeitena, intijeitempa, aisati intayenari ivira impincatsatantenari. ²⁸ Eiro yantaveejeitantarotsi; tempa irotaquequitaiteri nompeacotantempirori caari cameetsatsi. Tempa narotaque Tasorentsisanori Pitasorentsiti. ²⁹ Jaanica caari titachane quitaiteriquica, ocameetsati irojoqueeteri, eiro icarajeitajiritsi ishanincapee. ³⁰ Aisati antaveetantaquearoneri, nompeajeri, eiro icarajeitajiritsi ishanincapee.

³¹ “Eiro catsini yantaveejeitantarotsi. Oca nocantacantiri oncantaitatiyempani. Irotaque irimoncarajeiteri iriori pishanincajeitajeri aisati itomipee jaocapeerica irisavicayeteri. ³² Irotaque oca quitaiteri irimaoreantapinijeitari aisati intijeitempa. Ocameetsati irintanaquearo ishaaviniji ora quitaiteri 9 irisati cashiri sietetatsiri, irosati onquitaiteamanaque, ari ishaaviniji irovecaraanajero.”

Inquimoshireventantearori ivancoshetajaniqipee.

(Núm. 29.12-40)

³³ Icantiri Tasorentsi Moisesi:

³⁴ “Jero ca pincerteriri pishanincapee: Ora quitaiteri 15 irisati cashiri sietetatsiri, ocameetsati inquimoshireventeró yovetsicantayetarori

ivancojaniquipee, impincatsatantenari oncarate 7 quitaiteri.

³⁵Irintanaquearorica irampatotimentajeitena, eiro catsini yantavejeitantarotsi. ³⁶Oca caratatsineri 7 quitaiteri, ocameetsati intaapinitenari icashiacyetanari, impincatsatantenari. Iroquea onquitaitetamanaque 8, irosati irampatojeitantajea aisati, intaajenari ivira. Irotaque oca inquimoshireventapinijeitantenari, eiro catsini yantavejeitantarotsi paitapeerica pomerentsitasanoyetachari.

³⁷“Irotaque oca quitaiteripee nonashitacaacari, irampatotimentapinijeitantenari iramapinijeitantenarori icashiacyetanari: intaementerori caari cameetsatatsi, intaasanoyetenari ivanquirepee, iroimenterori naacameetsatantajeariri, aisati ovaja itsipatairori itaayetanari. Ocameetsati iramapiniyetero aparopeeni quitaiteri nonashitacaayetacari. ³⁸Irointiquea imaoreapinijeitantari, ipincatsatantanari, aisati iramapinijeitantenarori impashiyetenari jero icashiacaanari.

³⁹“Ora quitaiteri 15 irisati cashiri sietetatsiri, ariorica intsoncaquero yaviiyetaquero ivanquirepee, ocameetsati inquimoshireventero, impincatsatantenari oncarate 7 quitaiteri. Irintanaquearo quitaiteri imaorejeitantari irosati ochotapaatsine, irimaorejeitantajeari aisati. ⁴⁰Ora intarori quitaiteri, ocameetsati irajeite chochoquipee ontime inchato cameetsayetatsiri aisati compiroshipee, inchashimpopee, jero pashini shiocayetatsiri nijaqui icanteetiri álamo. Irotaque inquimoshireventajeitantenari oncarate 7 quitaiteri; tempa narotaque Tasorentsisanori Pitasorentsiste. ⁴¹Ocameetsati inquimoshireventapinijeitero oca aparopee osarentsi, oncarate 7 quitaiteri yora cashiri sietetatsiri impincatsatantenari narori Tasorentsisanori. Oca nocantacantiri, oncantaitiyempani impincatsajeitena. Irotaque irimoncarajeiteri aisati iriori irishanincajeitajeari. ⁴²Oca quitaiteri caratatsineri 7, ocameetsati irisavicantajeitearo pishanincapee ivancoshetajaniquipee. ⁴³Irotaque in quenqueshiretapinijeitanteorori pishanincatajeari coajicani, peerani noimishitoajeitantajimpiri Egiptoqui. Tempa irotaque pisavicantajeitacari pivancoshetajaniquipee. Narotaque Tasorentsisanori Pitasorentsiste.”

⁴⁴Irotaque icantaqueriri Tasorentsi Moisesi. Ari icamantaqueri iriori ishanincapee oca quitaiteripee inashitacaayetacari Tasorentsi.

Quejitsi intsiotapiniteri.

(Éxo. 27.20-21)

24 ¹Ari icantajiri Tasorentsi Moisesi:
²“Pincanteri pishanincapee iramajeitaquempi oreji orivo ioshitaquea, ontsiotapinitanteari tsiorontsi, timatsiri acaqueroca oticaashiro Pancotsi Nonantari cameetsatasanotatsiri, otimantari Cajón.
³Yora Aarón iriotaque amenapiniteroneri ontsiotacotapinitantearori

maaroni tsiteniriqui Pancotsi papatotimentantanari, acaquero ca oticaashiroqui manacotirori Cajón onantari Nocantacantiri. Oca nocantiri oncanteani ontime, irosati irineajeitaje pishanincatajeari coajicani. ⁴Ocameetsati irovetsicapinitero tsiorontsi vetsicachari ioshitachari oro, intsiotacotapinitantearori Nonantapinitari.

Tanta iroapiniteri Inantariqui Tasorentsi.

⁵“Aisati ocameetsati iraye cameetsavanetatsiri tirico irovetsique 12 tontacotari tanta, oncarate ontenayete aparopeeni 4 kilo ari nianqui. ⁶Impoiji iroyetero meesaqui cameetsatsiri, oncarate apite iroveshintsaaque, oncarayetaque 6 apashintsaquiropee. ⁷Aisati iroaqueri iroori casancavaneri oveshintaayetaca tanta, irotaque inquenqueshiretapinitantearori noneacameetsajencatasanaotaquero oca itaaquenari. ⁸Incanteani iroapinitero oca Nonantariqui quitaiteripeequi imaoreantari, irotaque nonquenqueshiretacotantearori nocantasanotaqueriri pishanincapee, noncarajeitaquempi. ⁹Irotaque iroyeari iriori Aarón aisati irishanincajeitajeari. Ocameetsati iroajeitearo oca tanta oyaiteriqui Nonantari; tempa ocameetsatanotaque, irotaque itaarantapinitanari nonashitacaasanotacaró.”

Iroasanquetayeri Tasorentsi cantimataqueriri.

¹⁰⁻¹¹Itimi aparo shirampari otomi Selomit, ishanincapee Israel, irio iriri egiptosati. Ora iriniro irotaque irishinto Dibrí, ishanincasanorini iriori Dan. Yora shirampari iquisaqueri aparoni ishaninca Israel isavicajeitinta. Iquisavacaajeitancari, iquisatsataqueri icantimataqueri Tasorentsi. Iquemanteetariri, irosati yaanteetanacanari Moiseshi. ¹²Ari yoatiacantavaqueritsita, impoiji icantiri Tasorentsi jaoca incanteriri. ¹³Ari icantiri Tasorentsi Moiseshi:

¹⁴“Pijate paanaqueri cantimataquenari otsapitapaacanta pisavicajeitantari. Pincanteri quemajeitaqueriri iroanquetenerita iracopee iitoqui. Impoijiquea impichaajeiteri maaroni pishanincapee. ¹⁵⁻¹⁶Meeca pincamantasanoteri iriori pishanincapee: Jaanica tseencaquenane aisati cantimataquenane, ontime irantane. Ocameetsati impichaajeiteri maaroni pishanincapee, irosati incamantaquea. Aisati inquempyeeteri iriori pashinisati, iriorica pishanincasanori incantimataquenarica; ocameetsati incame.

¹⁷“Jaanica oantatsine, ocameetsati iroyeetajeri iriori.

¹⁸“Jaanica oitanterine virantsi itsipa, ocameetsati impinaajeri yoitaqueriri.

¹⁹“Jaanica oashinoncayerine ishaninca, aisati inquempyeetajeri iriori, iroashinoncayeetajeri. ²⁰Yora carajantatsine, aisati incarajeetajeri iriori. Yora posajaquitantatsine, aisati imposajayeetajeri iriori.

Yora ajireitanterone ajitsi, aisati irijireiteetajeri iriori. Irisati quemaatsiyetajearone paitapeerica irantayeteri.

²¹ “Jaanicarica oitanterine virantsi, ocameetsati impinaajeri yoitaqueriri. Jaanicarica oantatsine, ocameetsati iroyeetajeri iriori.

²² “Oca nocantacantiri irotaque irashi iriori pashinisati aisati pishanincapee. Tempa narotaque Tasorentsisanori Pitasorentsite.”

²³ Ari icamantaqueri Moiseshi ishanincapee, irosati yomisoquijantacari tseenquimataqueriri Tasorentsi. Yaanaqueri otsapitapaaca isavicajeitantari, ipichanajeitaqueri irosati icamantaca. Imataquero icantaqueriri Tasorentsi Moiseshi.

Sietetatsiri osarentsi irimaoreacantearori quipatsi.

25 ¹Iquenquetsatacantacariri Tasorentsi Moiseshi toncaariqui Sinaí. Icantiri:

² “Jero oca pincamanteriri pishanincapee: Ariorica pareejeitaquearo quipatsi nompempiri, ocameetsati pishinetero quipatsi omaoreavaquetsita, pimpincatsatantenari. ³ Ocameetsati pantaveetapinite poanequi aisati pintojempequitantayetearori povamashite jero paviitantayetearori oitsoquipee oncarate 6 osarentsi, ⁴ Iroquea sietetapaatsiri osarentsi, ocameetsati pishinetero quipatsi ontimashitavaqueata, pimpincatsatantenari. Eiro pipanquiveetantajarotsi aisati eiro pitojempequitantayetajarotsi povamashite, ocantavacatsita quipatsi iroori. ⁵ Aisati eiro pipesayetajirotsi tirico shiocashiyetanajchaneri poveraantavacarori paviitavajiro. Aisati eiro picoyeayetiotsi oitsoquipee povamashite caari pitojempequiyeti, omaoreasanoteta iroori quipatsi. ⁶⁻⁷ Maaroni shiocashiyetanajchaneri osarentsiqui pimaoreantari, irotaque poajeiteari iriori aisati piveranaropee, antaveeyetimpiri, jeri pashinisatipee saviquimoyetimpiri, aisati pivirapee jeri covencatsiri, camatsayetatsiri timayetatsiri quipatsiqui.

Osarentsi Yoipacanteetarori.

⁸ “Ocameetsati pimincaratero 7 otomincotepee osarentsi, irosati omoncaratantaquea 49 osarentsipee. ⁹ Yora cashiri caratapaatsineri 7 iro 10 quitaiteri, irotaque nopeacotantarori caari cameetsatatsi. Ocameetsati pintioteri itseequi ovisha, ojajencatanaque maaroni nampitsipeequi. ¹⁰ Ariorica omoncaratapaaquea 50 osarentsi pincamantacotero nonashitacaacaro: ocameetsati pineacameetsatasanojeitero. Pincamanteri pishanincapee: ‘Oca osarentsi irotaque irashi peranarontsipee pishinejeitantajeariri impiashijeitanajeri ishanincasanoripee aisati iipatsitepeequi irisavicajeitapaajeta.’ ¹¹ Ora caratatsineri 50 osarentsi, irotaque poimpacaajeitantarori pantaveerepee, eiro pipanquiveeyetajitsi,

eiro pipesacoyetajirotsi tirico shiocashiyetanajchaneri, eiro pitojempequiyetajirotsi povamashite aisati eiro paviiyetajirotsi oitsoquipee. ¹²Tempa irotaque osarentsi cameetsatasanotatsiri oipacaacoventajeitimpiri. Irointi poapinijeitea shiocashiyetanajachari.

¹³“Oca osarentsiqui poipacantarori pantaveere, oshinetanta paayetajero maaroni piipatsitepee. ¹⁴Intimerica pimanterone iipatsite, irompa iriorica itsipa amananterone, eiro yamatavitavacaimentarotsi; ¹⁵yora amananterone, ocameetsati impinatero osarentsipeequi jaocarica oncarate irantaveetapinitantearo, irintanaquearo Osarentsi Yoipacaacoventanteetariri. Aisati pimanterone, ocameetsati incoacotante osarentsipeequi omoncaratapinita yaviitapinitanteetarori panquirentsi. ¹⁶Oshequitatsirica osarentsi iraviitapinitantearori ivanquire, ocameetsati incoacotasanteri quimota ovinaro. Irompa teerica oshequitanaaje, ocameetsati incoacoteri capichaji. Irointiquea incoacotasanteri ariorica oshequite ivanquire.

¹⁷“Eiro catsini pantanatavacaimentarotsi. Ocameetsati irointi pimpincatsatena. Tempa narotaque Tasorentsisanori Pitasorentsiste. ¹⁸Ocameetsati pimincarajeitero nocantacantiri aisati pimatasañojeitero nocoacaimpiri. Ariorica pimincarajeitero, cameetsa pisavicajeite piipatsitequi. ¹⁹Oncanteani oitsoquiyete pivanquirepee, irotaque poajeiteari pinquemapinijeitearo, tecatsi coiteimojeitempine.

²⁰“Ariorica pinquenqueshiretea, pisampitavacaayetea: ‘¿Paitampa avajeiteari omoncaratapemparica 7 osarentsi, eirorica apanquiveetajitsi, aisati eirorica aviiyetajirotsi oitsoquipee?’ ²¹Tempa aitaque nontasoncaventaquempi oncaratapaaquerica 6 osarentsi, ontimanteari oitsoquitasanoyete pivanquire poajeiteari, pimincaratanterori mava osarentsi. ²²Irotaque poajeiteari piquempoyeanontacari irosati aretantapaajea ochotapaatsiri osarentsi pimpanquijeitantajeri. Aisati ariorica oncaratapaaje 9 osarentsi, irosatiquera poajeitearo piquempoyeanontacari; irosati omoncaratantajea paviiitantajearori pivanquire.

²³“Eiro pipimantasantirotsi quipatsi; tempa irointi nashi. Noshinetashitimpuro pisavicaantearo, noshicantaquempi quivantanari. ²⁴Irotaque nocantantari: Ora quipatsi pamanantavetari, ocameetsati pishinetajeri ashitasanotarori impinacoventajero, iraantajearori aisati.

²⁵“Intimerica pishaninca oncoiteimotasanoteari paitapeerica, impimantaquerorica iipatsite, itimirica ishanincasanori; ocameetsati impoque impinacoventajero, iraantajearori ipimantavetacari ishaninca.

²⁶⁻²⁷“Irompa eirorica itimitsi ishanincasanori aajerone, ariorica irampatotimentajero ovinaro irisati aajerone; ocameetsati irimoncaratajero osarentsipee ipimantantacarori. Impoiji impinatajери quireequi amanantaquerori. Irosati iraantajeero aisati iipatsite. ²⁸Irompa teerica intimasanoteji iireequite iraantajearori iipatsite, irosati oncantea

irashitearo amanantaquerori. Ariorica omoncaratapaajea Osarentsi Yoipacanteetaroni, ari ontimashitanajea. Impoijiquea oshinetantajea irraajero pimantavetacarori, irisavicantajea.

²⁹“Intimerica pimanterone pancotsi timatsiri nampitsiqui tantotacotachari, ocameetsati irampiitajero iramanantajero omoncaratapaajea aparo osarentsi ipimantantacarori. ³⁰Irompa eirorica yamanantitajarotsi, omoncaravetapemparica aparo osarentsi; irosati oncantea, ontime irashitsanotearo amanantaquerori jeri irishanincajeitajeari. Aisati eiro oshinetantajatsi ariorica omoncaravetapaajea Osarentsi Yoipacanteetaroni. ³¹Irointiquea pashini pancotsipee timatsiri nampitsiqui caari tantotacotachane, aisati oquempetaro quipatsi. Ocameetsati irayeetajero aisati oshinetantajea Osarentsiyoipacanteetaroni.

³²“Irointiquea ivancopee ishanincapeeni Leví timatsiri nampitsiqui tantotacotachari, oshinetanta iramanantapinitero. ³³Iriorica ishanincasanori amanantajerone, ocameetsati irojocanjero omoncaratapemparica Osarentsi Yoipacanteetaroni, irijatana je otiminta ivanco iriori. Tempa irotaque irashisanori iriori pancotsi timatsiri nampitsiqui, isaviquimojeitantariri pishanincapee. ³⁴Aisati oquempeta quipatsi oshiocantayetari paashitopee otimayetinta inampipeequi, irotaque irashitsanori iriori, eiro catsini ipimantayetirotsi.

³⁵“Intimerica pishaninca oncoiteimotasanotearirica paitapeerica, impocashitempirica, ocameetsati pamitacoteri. Pinquempetacanteri pashinisati avisayetatsiri, poisavicavaqueri pivancoqui. ³⁶Eiro paapitsatavaqueritsi yashitari, aisati eiro picoacotasantiritsi iroimpiajempim quimota paitarica pimperi. Nocoasanotaque pimpincatsatanotena; tempa narotaque Pitasorentsiste. Irotaque nocantantimpiri, paacameetsatavaqueri pishaninca pivancoqui. ³⁷Eiro picoacotiritsi iroimpiajempim quimota quireequi ariorica pimperi, aisati eiro poanairotsi ovinaro oanarontsi pimperi. ³⁸Narotaque Tasorentsisanori Pitasorentsiste, oimishitoajimpiri Egiptoqui, pisavicajeitantajeari quipatsiqui Canaán Pitasorentsitanenari.

³⁹“Intimerica pishaninca saviquimotempine oncoiteimotasanotearirica paitapeerica, incantempirica: ‘Pantaveetacayena’, eiro pantaveetacaasanotiritsi piquempetacantiricari iperanayeetari. ⁴⁰Irointi pinquempetacanteri antaveetatsiri quitaiteripeequi, aisati iriorica quivantimpiri. Ocameetsati irantaveetempi, irosati omoncaratantapaajea Osarentsi Yoipacanteetaroni. ⁴¹Irosati irojocantanajea pivanco, irraajeitanajeri itomipee impiantanajeari iipatsitequi ishanincasanori. ⁴²Tempa iriotaque iriori quemisantajeitanari; aisati narotaque oimishitoajimpiri Egiptoqui. Te oncameetsateji pinquempetacantavacayea iperanayeetari. ⁴³Eiro poashinoncairitsi, ocameetsati pimpincatsatanotena; tempa narotaque Pitasorentsiste.

⁴⁴“Picoirica intime shirampari, iroorica tsinane, piveranaro, ocameetsati pamananteri savicayetsiri nampitsipeequi. ⁴⁵⁻⁴⁶Aisati noshinetempi pamananteri pashinisati saviquimotimpiri. Aisati itomipee timayetaintsiri piipatsitequi, iriojeitaque pamananteri pashitanotanteariri. Iriotaque pojocanjeneriri pitomipee ariorica pincamaque, imperanajeiteari iriori. Irintiquea pishanincasanori, eiro piperanatasanojeitaritsi, poashinoncairicari.

⁴⁷⁻⁴⁹“Iriorica pashinisati saviquimotempine piipatsitequi irashitaarantanaquearica, aisati intimerica pishanincasanori tsipanampitariri oncoiteimotasantaqueari paitapeerica, incanteririca: ‘Nocoi nantaveetempi’, impoiji imperanatasanteari, iriorica itsipa pashinisati; itimirica ishanincasanori: iriorica irirentisanori, iriritsori, irentitsori, ocameetsati impinacotentajeri iroimpacotentajeariri. Irompa timatsirica iireequite, irisati pinacotentajachane. ⁵⁰Irimoncaratajeneri osarentsipee intantanacarori yomperanatacantaca, irosati Osarentsiqui Yoipacanteetaroni. Aisati ocameetsati irimoncaratero osarentsipee jaoca ocarati yantaveetaqueneri. Aisati jaoca ocarati ipinayeetiri antaveetapiniyetatsiri. ⁵¹Oshequitatsirica osarentsi irisaviquimoteri, ocameetsati impinatajeri quimota. ⁵²Irompa teerica oshequitapaaje osarentsi omoncaratantajeari yoipacanteetaroni, ocameetsati impinatajeri capichaji. ⁵³Ocameetsati inquempetacanteri antaveetatsiri aparoni osarentsi; eiro pishinecoventiritsi iroashinoncaasanoeyeeteri.

⁵⁴“Irompa tecatsirica pinacotentitajearine aisati itomipee, ocameetsati irishinetajeri irijajeitaje omoncaratapaajearica Osarentsi Yoipacanteetaroni. ⁵⁵Maaroni pishanincapee, iriojeitaque quemisantanari. Narotaque Tasorentsisanori Pitasorentsite, oimishitoajimpiri Egiptoqui.

Intasoncaventeri Tasorentsi quemisantiriri.

(Deut. 7.12-24; aisati 28.1-14)

26 ¹“Eiro povetsicashiyetatsi paitapeerica pijitasorentsitantearori, aisati eiro poatiayetirotsi mapipee pinampiqui, aisati eiro pisanquenayetirotsi, pimpincatsatantearori; tempa narotaque Tasorentsisanori Pitasorentsite. ²Pimaoreantapinijeitearo quitaiteri sábadó nonashitacaari aisati pimpincatsatero Nonantari: narotaque Tasorentsisanori.

³⁻⁴“Irosatirica pincanteani pimoncarajeitero nocantacantiri aisati pimajeitaquerorica nocoacaimpiri; aitaque nontiancaquempiro incani omoncaratapiniyetea oshiocantayeteari pivanquirepee, oitsoquitantayeteari aisati inchatopee. ⁵Ontimasanooyete tirico irosati pavitiantajearori iroori ovapee, aisati ontimasanote iroori ovapee, irosati omoncaratantajea pimpanquitantayetajeari. Pincanteani poapinijeitearo tanta pinquemapiniyetea. Pincanteani pisavicaajeite cameetsa piipatsitequi.

⁶“Narotaque savicacayempine cameetsa, tecatsi antanatempine, cameetsa pimaapiniyete. Narotaque ticacotentempine eiro

imapocantimpitsi covencayetatsiri aisati manajeitempineri.

7Avintiquea oimishiajeiterine manajeivetempine, poijanajeitanaqueri poajeitavaqueri pisataamentopeequi. 8 Ariorica pincarajeivetea 5, aitaque poimishiajeitaqueri carajeivetachane 100. Aisati pincarajeivetearica 100, aitaque poimishiajeitaqueri carajeivetachane 10,000, poajeiteri pisataamentopeequi.

9“Namenacoventasanotempi aisati noshequitacaasanotajempi, irosati noncanteani nomoncaratempiro nocantasanotitaquempiri, noncarajeitempi. 10Pincanteani poapinijeitearo tirico piquempoyeanontacari avisanaintsiri osarentsipeequi, irosati pijocashitantajearo pinquempoyeantajearori iroaqueratatsiri.

11-12“Noncanteani nosaviquimotempi, eiro nojoquimpitsi; quiso noasanotempi. Narotaque Pitasorentsire, avirojeitaque noshanincapee. 13Narotaque Tasorentsisanori Pitasorentsire oimishitoajimpiri Egiptoqui, eiroquea iperanajeitantajimpitsi. Narotaque oipacaacoventajimpiri yoas hinoncaasanojeivetaquempini; meeca nontimacayempi cameetsa, tecatsi oashinoncaajempine.

Icantasanotiri Tasorentsi iroasanquetayeri caari quemisantiri.
(*Deut. 28.15-68*)

14-15“Irompa eirorica piquemisantanatsi aisati eirorica pimocaratirotsi maaroni nocantacantiri, irointi pintseencaquero nocantasanovetaquempiri noncarajeitempi, 16 aisati nonquempetempi narori nontianquempiro oashinoncantsi: pintsaroasanojeite, mantsiarentsijenca, oamaantatsiri, catsiirentsi, catsijarentsi aisati catsinaveerentsi; pantsipetearo pimpanquiyeveatea, iroitajeitempiro manajeitempine. 17Aitaque nonquisanaquempi, noshineteri manajeitempine intsoncajeitempi; iranaacojeitempi quisanentajeitimpiri aisati pishiashijeitea, tecatsi oijanavetempine.

18“Pineavetaquearorica ocapee, aiqero pijatatiye eiro piquemisantanatsi, noasanquetaasanotempi oncarate 7. Noasanquetamentapinitempiro pantayetaqueri caari cameetsatatsi. 19Noncantacaashireasanotempi eiroquea pishemetantanajatsi; aisati noncantaitetacayearo inquite eiro opariantajatsi incani, onquisoiteanaqueta quipatsi eiro oshiocayetanajitsi pivanquirepee. 20Pantsipetearo pishintsiventero pantaveere, eiro pineirotsi oitsoquiyete pivanquire, aisati iroori inchatopee, eiro oitsoquiyetanajitsi.

21“Irosatirica pincantea pimpiatsatena, eirorica pinquemisantantsi, aitaque noasanquetaajempi aisati; oncarate 7 noasanquetamentapinitempiro pantayetaqueri caari cameetsatatsi. 22Nontianquempiri covencayetatsiri intsonquitajeitapempiri pitomipee aisati irantsiquitayetapempiri pivirapee. Eiro pishequiasanojeitanajitsi, tecatsi timatsine aniiyetanajantsine avotsipeequi.

23-24 “Ariorica pineajeivetaquearo ocapee, eirorica piquenqueshirejitajatsi, irosatirica pincantea pimpiatsatena; aisati nonquempetajempi narori, oncarataje 7 noasanquetamentapinitempiro pantayetaqueri caari cameetsatsi. 25 Nontianquempiri manajeitempineri, iroimentempiro te pimoncaratero nocantavetaquempiri, nocoaveta noncaratempine. Pishiajeivetanaquea pinampipeequi aisati nontianquempiro mantsiarentsipee, irosati intsoncajeitantempi manajeitempine.

26 “Ariorica nontsonquitaquempiro piquempoyeantayetarori poayetari, ontimanaje aparoni otashitapinitantari tanta. Oncaraterica 10 tsinane tashitante arone, ariorica ompajeivetaquempi, eiro piquemajeitanajarotsi.

27-28 “Pineajeivetaquearorica ocapee, aiqero pijatanaitiye eiro piquemisantanatsi, aiqero narori nonquisasanotempiri; oncarataje 7 noasanquetamentasanojeitempi caari cameetsatsi. 29 Irosati poajeitantanaqueari pitomipee aisati pishintopee. 30 Nompoyereasanotero pipincatsatapinitantarori povetsicashiyetari, aisati pitaapinitantaroniri casancavaneri. Pintsoncasanojeitea pincamajeite, pincaratero povetsicashiyetari onareajeitea pivatsapeeni; niotacaasanotempi queario nopincaquero. 31 Aisati oncaaraiteanaque pinampipeeni, nontsonquero pancotsipee pipincatsatashitantanri pijitasorentsitane. Aisati eiro noneacameetsajencatajirotsi casancajencayetatsiri pintayevenari.

32 “Nontsoncasanotero pinampini, impoiji impocajeite quisajeitimpiri iroajeitapaaque cavaco, irosati irisavicajeitantapaaaje. 33 Avirojeiquea pinquenayetanaque otsipapeequi nampitsi, iroijanajeitanaquempi oajeitempineri tecatsi paanaque; pintsaroasanojeitanaque pojocanaquero piipatsiteni aisati iroori pinampipeeni. Tecatsi timajeitantaje arone. 34 Irosati ontojasheiteantanajea quipatsi, tecatsi antaveetanajerone, oncanteani ontimashitanajea. Avirojeiquea savicatsine iipatsitequi quisanentimpiri. Aitaque oncanteari omoncaratajea te pishineteroni ontimashitea. 35 Oncanteani ontimashitanajea quitaiteripeequi, eiro oquempetaja ainiroquerani pisavicantajeitaro te pishineteroji ariorica omoncaraveta Osarentsi Yoipacanteetarori.

36 “Yora pishanincapee caari yoyeeti, savicatsine iipatsitequi quisajeitimpiri, noncantashireacaasanotero intsaroashiretasanotanteari. Inquemayeterorica ompoimate inchatoshi ompariayete, irishiapitsatashiyetearo inquempetacantanaquea iroijanayeteririca iroyeeteri. Aisati irimpariashiyetea tecatsi oijanavetearine; 37 intsitincavacaashiyetanaquea tecatsi oijanajeivetearine, inquempetacantanaquea irimapoqueeteririca irimanayeeteri. ¡Eiro catsini itimitsi aparoni picarajeitica platearine manajeitempine! 38 Ari anta nampitsipeequi pisavicaveeteri, pimpeajeiteari, intsoncajeitempi quisajeitimpiri. 39 Yora caari yoyeeveta oamaajeiteri irantane, ¡inquempejeiteari intacantajeitimpiniri oamaaqueri iriori yantajeitiniri!

⁴⁰“Ariorica pinquenqueshirejeivetanjaea, piotacojeivetanjaea te oncameetsateji pantajeitaqueri; piquempejeitacari intacantajeitimpiniri, te inquemisantenaji, irointi ipiatsataquena. ⁴¹Irotaque nompiatantempiri narori, irajeitanaquemipai iipatsitequi quisajeitimpiri. Ari pinquenqueshireacojeivetapaajeari te pincameetsate. Irotaque pashinoncaimentantarori caari cameetsatatsi. ⁴²Irosati nonquenqueshireantanajearo nocantasanotaqueriri Jacoboni, Isaacani jeri Abrahamani: ‘Noncarajeitempi’; aisati nonquenqueshireacotanajero quipatsi pojocajeitanaqueri. ⁴³Otimashitasanotanaca ainiroquera avirori pisavicajeiti areejiqui pashinoncaimentearo pantaqueri; tempa pitseencajeitaquero nocantaquemipiri, te pinquemisanteroji nocantacantaqueri.

⁴⁴“Oncantavetaquea pisavicajeite iipatsitequi quisajeitimpiri, eiro nopeacojeitimpitsi, eiro nojocajeitimpitsi, eiro notsoncajeitimpitsi aisati eiro nopeacotarotsi noncarajeitaquempi. Tempa narotaque Tasorentsisanori Pitasorentsite. ⁴⁵Irointiquea nonquenqueshireapinitero nocarajeitaqueri noimishitoantajariri Egiptoqui, Itasorentsitantanari. Tempa ineajeitaquero nampitsiquiniri nomataqueri. Narotaque Tasorentsisanori.”

⁴⁶Irotaque oca icantasanotaqueriri Tasorentsi Moiseshi toncaariqui Sinaí. Yoametaqueri maaroni icantacantiri, icamantajeitantariri ishanincapee.

Inashitacaayetanariri Tasorentsi.

27 ¹Ari icantiri Tasorentsi Moiseshi:

²“Jero oca pincamanteriri pishanincapee: Itimirica pishaninca incashiacaquenari irinashitacayenari ishaninca, jeroa oncarate impinacoventeriri.

³“Iriorica shirampari moncarataquerori 20 irosarentsite irosati 60, ocameetsati impinacoventeri 50 imentaqui quireequi, moncaratachari Nonantariqui.

⁴“Iroorica antearo tsinane, impinacoventero 30 imentaqui.

⁵“Iriorica timatsiri 5 irosarentsite irosati 20, ocameetsati impinacoventeri 20 imentaqui. Irooquee tsinane, incarate 10 imentaqui.

⁶“Irioquee jananequi carataintsiri aparo iyashirite irosati 5 irosarentsite, oncarate impinacoventeri 5 imentaqui quireequi. Irooquee iroori tsinanejaniqui, incarate 3 imentaqui.

⁷“Irioquee avisanaquerori 60 irosarentsite, oncarate impinaventacoteri 15 imentaqui. Irooquee tsinane, incarate 10 imentaqui.

⁸“Irompa iriorica caari otimimotasanoti impinacoventeriri, ocameetsati iranaqueri antaveetatsiriqui, incantanteariri paitarica impinacoventeriri.

⁹“Iriorica virantsiyetatsiri incashiacayenari, ari nonashitacayeari maaroni. ¹⁰Eiro catsini ipinayetajiniritsi itsipapee virantsi, omavetaquea

icameetsatirica, terica incameetsate. Irompa ariorica impinaavetaqueari, iro cantaincha irosati incantea apiiteroqueti nonashicaasanoteari.

¹¹“Irompa iriorica virantsi caari cameetsayetatsi, caari nocoi intayeetenari, ocameetsati iranaaqueri antaveetatsiriqui, ¹²iramenantavaqueariri jaoca icantari aisati jaoca incanteriri.

Irineavaqueririca, irio cantatsine jaoca oncarate ipinata. ¹³Icoaquerica iraajeri aisati, ocameetsati impinaventajeri quireequi, iroanaavajeneri capichaji ocarati icantaqueri antaveetatsiri.

¹⁴“Jaanicarica cashiacayenarone ivanco, irio antaveetatsiri cantatsine jaoca ocarati opinata, ocameetsatirica, irompa teerica oncameetsate.

¹⁵Icoaquerica iraajero aisati, ocameetsati impinaventajero quireequi, iroanaavajeneri capichaji ocarati icantaqueri antaveetatsiri. Irosati irashitantajeero.

¹⁶“Jaanicarica nashitacayenarone iipatsite impaarantena, ocameetsati irimoncaratero jaocarica ocarati yaapiniti oitsoqui. Ariorica yaapinti 220 kilo cebada, aitaque ocaratiri opinata 50 imentaqui quireequi, ¹⁷Ariorica inashitacaaquenaro Osarentsiqui Yoipacanteetaroni, irosati oncantea ovinaro. ¹⁸Irompa inashitacaaquenarorica avisanaque oni Yoipacanteetaroni, ocameetsati irimoncarateri antaveetatsiri jaoca incarate quireequi ompinatea. Irosatirica oshequite osarentsipee, incoacotajeri oshequi; irompa teerica oshequitanafe, incoacotajeri capichaji.

¹⁹“Yora cashiacaaquenaroni icoaquerica iraajero aisati, ocameetsati impinaventajero quireequi, iroanaavajeneri capichaji ocarati icantaqueri antaveetatsiri. Irosati irashitantajeero. ²⁰Irompa eirorica yaajirotsi, impimantajerorica iraajero pashini, eiro imatajirotsi iraajero. ²¹Omoncaratapaajearica Osarentsi Yoipacanteetaroni, ariorica otimashitanaja quipatsi, ocameetsati irashitacaasanotenaro. Irosati irasaanotantajeero antaveetatsiri.

²²“Jaanicarica cashiacayenarone quipatsi yamanantiri iriori, caari yashitacaari ishanincasanori, ²³ocameetsati irimoncaratacayeri antaveetatsiri jaoca oncarate ompinatea irosati Osarentsiqui Yoipacanteetaroni. Intsipaita impinatitaquearo ocarati ovinaro, irosati incashiacantaquenaro. ²⁴Ariorica omocaratapaajea Osarentsi Yoipacanteetaroni, irosati iraantajeero ashitasanotarori.

²⁵“Maaroni piotacotantayeteariri quireequi, ocameetsati pimincaratanoteari timatsiri Nonantariqui icanteetiri siclo tenatatsiri 20 gera. (Omoncaratiro 11 gramos.)

²⁶“Yora irijani pivira, jivatatsiri itimi, iriorica vaca aisati iriorica ovishajaniqui, eiro papiitajiritsi pashitacaajenari. Tempa aitaque nashitasanotacari. ²⁷Iriorica virantsi caari yoyeeta, ocameetsati pimpinacoventajeri jaocarica icarati ivinaro aisati poanaavajeneri

capichaji, paantajeariri. Irompa eirorica paajiritsi, ocameetsati impimantajeri ocarati ipinataca.

²⁸“Intimerica nashitacayetenarone paitapeerica yashiyetari: iriorica atiripee, ivirapee, iroorica iipatsite yashitacaariri ishanincasanori, eiro ipimantajirotsi aisati eiro yaajirotsi; tempa aitaque yashitacaaquenaro, ocameetsatasanotaque. ²⁹Aisati eiro imatirotsi impinacoventajeri ishaninca irantajeariri, icantacoventeetiririca iroyeeteri. Aitaque iroyeetaqueri.

³⁰“Otimirica pivanquirepee oitsoquiyetatsiri aisati chochoquipee, pijaayetaquerica 10, pinashitacayena aparoni; irotaque nashitasanteari. ³¹Picoaquerica paajero, ocameetsati pimpinacoventajero aisati poanaavajeneri capichaji ovinaro.

³²“Itimirica 10 pivacate iriorica povishate, ocameetsati pinashitacayena aparo. ³³Eiro picoyeayetavaqueritsi vatsayetachari aisati matsayetatsiri. Aisati eiro pipinaayetiritsi. Irompa ariorica pimpinaavetajeari pijivataqueri pinashitacaaquenari, irosati incantea apiiteroqueti nonashitacaasanteari. Eiro pimatajirotsi paajeri.”

³⁴Irotaque oca icantacantayetiri Tasorentsi, icantaqueriri Moiseshi toncaariqui Sinaí. Impoiji yovaaqueneri ishanincapee.